

թիւնը. արգելափակում ազգային հպարտութիւն պարզեւող մաշտոցեան օրերից հայի հանճարով ստեղծուած իմացական վիթխարի գանձարանը գրաբարեան լեզուի՝ հայորդի մտաւորական սերունդների հասողութիւնից.

«բ. հայոց լեզուի հնամենի բառապատկերների եղծումով եւ աղաւաղումով զրկում հայերէնը պատմա-մշակութային արժէւորումներից եւ ունեցած միջազգային նշանակութիւնից.

«գ. իմաստագրկում հայերէնի ունեցած միջազգային քաղաքակրթական նշանակութիւնից՝ ամլացուելով միջազգային

հայագիտութեան ուսումնասիրման աւարկայ դառնալուց:

«Խոհական ոչ մի ժողովուրդ, բնականաբար, նման զոհաբերութեան չէր գնայ վասն ինքնաթերարժէքման եւ... մշակութային խեղումների:

«Պահանջելով՝
«Վերադառնալ մաշտոցեան ուղղագրական համակարգին՝ որպէս մեր ազգային ինքնութեան վաւերականութեան» (տե՛ս «Արմաշ», էջ 86, նաեւ մեր աշխատութիւնը՝ «Հայ լեզուաբանութեան առաջացման պատմութիւնը...», հտ. Բ, էջ 405):

ԱՔԵՄԷՆԵԱՆ ՊԱՐՍԿԱՍՏԱՆԻ XVIII ՍԱՏՐԱՊՈՒԹԵԱՆ ՏԵՂԱԴՐՈՒԹԵԱՆ ԾՈՒՐՋ

ԲԱԲԿԵՆ ՅԱՐՈՒԹԻՒՆԵԱՆ

Պարսից թագաւոր Դարեհ Ա Վշտասպը (522-485 թթ.), յաղթանակ տանելով գահի համար մղուած պայքարում, Աքեմէնեան պարսից տէրութիւնը ենթարկեց վարչական վերածելումների, բաժանելով այն 20 սատրապութիւնների: Պատմահայր Հերոդոտոսի տեղեկութեան համաձայն՝ «Իւրաքանչիւր ազգի նա կցեց մերձակայ հարեւաններին եւ, բացի այդ, հեռուոր ազգութիւններին միացրեց այս կամ այն իշխանութեանը»¹: Հնարաւոր է, որ այս սկզբունքը երբեմն խախտուել է, կապուած, թերեւս, աշխարհագրական կամ տարածական գործօնի հետ, սակայն դժուար չէ տեսնել, որ պարսից արքունիքի նպատակը՝ որպէս պետական քաղաքականութիւն, եղել է ոչ թէ որեւէ ժողովրդի վարչական տրոհումը սատրապութիւնների մէջ, այլ մի քանիսին մէկ վարչական միաւորի մէջ ներառնելը: Ուստի կարծում ենք, յոյն պատմիչի տեղեկութիւնները Հայաստանի եւ հարեւան երկրների մասին նոր մեկնաբանութեան կարիք ունեն: Ըստ Հերոդոտոսի՝ «Պակտիկէից, արմէններից² եւ հարեւաններից մինչեւ Եւքսինեանը ստացուում է չորս հարիւր տաղանդ, սա տասներեքերորդ նահանգն էր»³: Ուսումնասիրողների ցայսօր քաղաքացիութիւն ստացած կարծիքով՝ Հայաստանին է վերաբերում նաեւ տասնութերորդ սատրապութեան նկարագրութիւնը, որի մասին ասուում է. «Մատիենների, սասպեյրների եւ ալարոդների վրայ սահմանուած էր երկու հարիւր տաղանդ հարկ. սա տասնութերորդ նահանգն էր»⁴: Ստացուում է, չնայած բոլոր փաստերին եւ փաստարկումներին, մի անհեթեթ վիճակ: Մի կողմից՝ բոլոր

տուեալները յստակ հաւաստում են հայ ժողովրդի գոյութիւնը Արեւելեան Հայաստանում, որտեղ փորձում են տեղադրել XVIII սատրապութիւնը, իսկ միւս կողմից՝ ըստ Հերոդոտոսի, վերջինս բնակեցուած է ոչ թէ հայերով, այլ մատիեններով, սասպեյրներով եւ ալարոդներով: Ուստի հակասական եւ իրարամերձ տեղեկութիւնները հաշտեցնելու նպատակով կամայ թէ ալամայ, ծնունդ է առնում այն եզրակացութիւնը, թէ ալարոդների տակ պէտք է հասկանալ հայերին կամ էլ հայացած ուրարտացիների հետնորդներին: Նման եզրակացութեան յանգել է Գ. Սարգսեանը, որն, անդրադառնալով այդ խնդրին, գրել է. «Արեւելեան (Հայաստանի - Յ. Բ.) մասի վերաբերեալ այդ (հարցուփորձից, պարսիկների եւ յոյների պատմածներից, լոգոգրափոստների գրառումներից) աղբիւրները լռել են, եւ Հերոդոտոսը նոյնիսկ չի իմացել, թէ Հայաստանը (Արմենիան) տարածուած է նաեւ այդ հողերում: Դրանց մասին նա տեղեկացել է միայն պարսկական պաշտօնական վաւերագրերից, այն էլ արամերէնից արուած յունական թարգմանութիւններից, որտեղ Հայաստանը (Արմենիան) հնացած ձեւով կոչուել է Ուրարտու: Այսպէս է պատահել, որ նա Արեւելեան Հայաստանը բնակեցրել է ալարոդներով (ուրարտացիներով), մինչդեռ այնտեղ հայերն են ապրել, ինչպէս այդ բխում է Բեհիստունեան արձանագրութեան մէջ այդ տարածքը Արմինա անուանելու փաստից: Ուրարտացիներն այդ ժամանակ այլեւս գոյութիւն չունէին, նրանք հայացել էին: Ուստի Հերոդոտոսի այս հաստատումը յիշատակուած ալարոդների տակ միանշա-

նակ կերպով պէտք է հասկանալ հայերին եւ վերը մէջ բերուած հատուածը (V, 94) հասկանալ այսպէս. «Մատիենների, սասպեյրների եւ ալարոների վրայ սահմանուած էր 200 տաղանդ հարկ: Սատանութերորդ շրջանն է»⁵:

Այս, անշուշտ, վերին աստիճանի սրամիտ բացատրութիւնը, ցաւօք, հանդիպում է մի շարք դժուարութիւնների ներքոյիշեալ պատճառներով: Նախ, սատրապութիւնների ցուցակը եւ սատրապութիւնների մէջ մտնող ժողովուրդների ու ցեղերի ցանկը, անտարակոյս, Հերոդոտոսի ստեղծագործութիւնը չեն, որոնց հիմքում մասնակի դրուած լինէին յունական աղբիւրներ, իսկ միւս մասով պարսկական արամէագիր վաւերացիները: Հագիւ թէ կարելի է կասկածել, որ այն ամբողջութեամբ ծագում է պարսկական մի ինչ-որ փաստաթղթից: Հետեւաբար ենթադրել, թէ պարսիկները հայերի մի մասին անուանել են արմէններ, իսկ միւս մասին՝ ալարոներ, անընդունելի է: Բացառութեամբ կասպերի, որոնք յիշատակուած են երկու առանձին սատրապութիւնների մէջ եւ, որ կարեւորն է, նոյն անունով եւ այդ իրողութիւնը յատուկ քննութիւն է պահանջում, միւս բոլոր դէպքերում ժողովուրդները վարչականօրէն երբեք չեն բաժանուած, ուստի, աւելի շուտ, պէտք է ենթադրել, որ ամբողջ Հայաստանն է մտել տասներեքերորդ սատրապութեան մէջ, քան թէ վերջինիս տարածքում ստեղծուել են XIII եւ XVIII սատրապութիւնները:

Սակայն ամենաարտառոցն այն է, որ ասուածի լոյսով եւ ցայսօր հայագիտութեան մէջ արմատացած տեսակէտներով առաջնորդուելու դէպքում ստիպուած ենք յանգելու մի անհեթեթ եզրայանգման, թէ մակեդոնական-սելեւկեան շրջանում անգամ այսրեկ-

րատեան Արմենիան ընդգրկել է միայն Մոփքը, Աղձնիքը, Տուրուբերանը, Վանալճի աւազանը եւ Այրարատի մի մասը⁶: Եւ այդ այն դէպքում, երբ վանեան թագաւոր Ռուսա Ա-ի թողած Մովինարի արձանագրութեան տուեալները յստակօրէն արձանագրում են հայկական ցեղերի գոյութիւնը Արցախի եւ Ուտիքի տարածքում մ. թ. ա. VIII դարում⁷: Հետեւաբար, որքան էլ ցաւազին լինի որոշ կարծրացած տեսակէտների վերանայումը, պէտք է նորովի լուսաբանել Այսրկովկասի եւ Հայաստանի էթնիկ պատմութեան մի շարք խնդիրներ:

Հերոդոտոսի կողմից բերուած Դարեհ Ա-ի կազմաւորած սատրապութիւնների ցուցակը միանշանակ չի ընդունուում ուսումնասիրողների կողմից: Պատճառն այն է, որ Հերոդոտոսի հաղորդման տուեալներն իբր չեն համապատասխանում պարսից թագաւորների արձանագրութիւններում տրուած սատրապութիւնների հերթականութեանը: Ըստ որում, յատկապէս բարդութիւններ է յարուցում Այսրկովկասում եւ Միջին Ասիայում ստեղծուող սատրապութիւնների թէ՛ տեղադրութեան եւ թէ՛ սահմանների խնդիրը: Օրինակ՝ XVI սատրապութեան մէջ Հերոդոտոսը յիշատակում է Պարթեւստանը, Արեւան, Սոգդը եւ Խորեզմը, իսկ արձանագրութիւններում դրանք սովորաբար հանդէս են գալիս առանձին, եւ Սոգդը սովորաբար յիշուում է Բակտրիայի հետ մէկտեղ⁸: Նմանատիպ անհամապատասխանութիւնները առաջ են բերել այն միտքը, որ Պատմա-հօր ցուցակը նրա կամ նրան աղբիւր ծառայած Հեկատէոսին յայտնի երկրների եւ ժողովուրդների կամայական խմբաւորման արդիւնք է⁹: Այսուհանդերձ, ուսումնասիրողների գերակշիռ մասը հակուած է կարծելու, որ Հերոդոտոսեան ցուցակը արժէքաւոր է, չնայած անհամա-

պատասխանութիւնների խնդիրն տալիս է տարբեր բացատրութիւններ¹⁰: Չխորանալով խնդրիս մէջ՝ լուր նշենք, որ, համաձայն Ի. Մ. Դեակոնովի, Հերոդոտոսի ցուցակի հիմքում պարսկական պաշտօնական աղբիւր է ընկած, եւ որ Պատմա-հօր ցուցակում սատրապութիւնները թուարկուած են նրանց՝ Մարական տէրութեանը եւ այնուհետեւ Աքեմէնեան պետութեանը միացնելու հերթականութեամբ¹¹: Այս, անկասկած, սրամիտ եզրակացութիւնը, այնուամենայնիւ, յարուցում է որոշ դժուարութիւններ: Այդ դէպքում ինչո՞ւ առաջինը յիշատակուած են արեւմտեան եւ ոչ թէ կենտրոնական ու արեւելեան սատրապութիւնները: Կամ, ասենք, ինչո՞ւ Բաբելոնը Ասորեստանի հետ միասին կազմում է միասնական սատրապութիւն, երբ այն Մարական պետութեանը չի միացուել: Ուստի, ելնելով ցուցակի հերթականութիւնից եւ սատրապութիւնների տեղադրութիւնից, մենք գալիս ենք այն եզրակացութեան, որ սատրապութիւնների թուարկման հերթականութիւնը պայմանաւորուած է նրանց ձեւաւորման ժամանակաշրջանի հերթականութեամբ: Վարչական մեծ վերակառուցումները, որոնք ձեռնարկուեցին Դարեհ Ա-ի կողմից, պահանջում էին մեծ ժամանակ եւ կապուած էին որոշակի դժուարութիւնների հետ: Պարսից արքայից արքան, ամէն ինչից դատելով, վարչական վերափոխումներն սկսեց սկզբում արեւմտեան երկրամասերում, որոնց ժողովուրդների համար դեռ խորթ էր իրանական (մարական կամ պարսկական) տիրապետութիւնը, ի տարբերութիւն կենտրոնական ու արեւելեան երկրամասերի, որոնք, երկար ժամանակով գտնուելով մարական տիրապետութեան ներքոյ, եթէ անգամ չէին հաշտուել իրանական գերիշխանութեան հետ, ստիպուած էին եղել

համակերպուել դրան: Մեր կարծիքով՝ Հերոդոտոսը կամ նրա աղբիւր Հեկատէոսը որեւէ ձեւով չեն աղաւաղել պարսկական պաշտօնական աղբիւրը եւ Աքեմէնեան Պարսկաստանի վարչական բաժանումը ներկայացրել են անփոփոխ, սակայն վիճաբանութիւններ յարուցող Հերոդոտեան ցուցակի աղբիւրը, դժբախտաբար, պարզապէս մեզ չի հասել: Հարկ ենք համարում ընթերցողի ուշադրութիւնը հրաւիրել այն իրողութեան վրայ, որ Դարեհ Ա-ի թողած արձանագրութիւններում կայսրութեան մէջ մտած երկրների ցուցակները չէին կարող համապատասխանել սատրապութիւնների հերոդոտեան նկարագրութեանը, որովհետեւ դրանք վերաբերում են մինչվերափոխումների ժամանակաշրջանին: Պարսից տէրութեան համար մինչեւ վարչական վերակառուցումները, ամէն մի երկիր, ըստ էութեան, ներկայացնում էր վարչական մէկ միաւոր, սակայն սատրապութիւնների ստեղծումով վարչական բաժանման հիմքում դրուեց միանգամայն նոր գաղափար՝ վարչական մէկ միաւորի մէջ ներառել մի քանի երկրներ կամ ժողովուրդներ, որոնց գլուխ կանգնած պարսից սատրապը միշտ էլ կարող էր, նրանց միմեանց դէմ գրգռելով ու հակադրելով, ապահովել պարսից գերիշխանութիւնը կամ տիրապետութիւնը: Հերոդոտեան սատրապութիւնների նկարագրութիւնն արձանագրում է հէնց այս վիճակը:

Արդ, ինչպէ՞ս ենք մենք պատկերացնում Պարսից տէրութեան վարչական բաժանման իրականացման ընթացքը: Համաձայն մեր քննութեան՝ սկզբում կազմաւորուել են կայսրութեան արեւմտեան 6 սատրապութիւնները, որոնք տարածական առումով ընդգրկել են Փոքր Ասիան, Ասորիքը եւ Եգիպտոսը: Ուշադրութիւն է գրաւում այն փաստը, որ սատրապու-

թիւնները թուարկուած եւ նկարագրուած են արեւմուտքից արեւելք, հարաւ եւ հարաւ-արեւմուտք ուղղութեամբ: Առաջին սատրապութիւնը ներառնում էր Հոնիացիներին կամ հոնիական յոյներին, ասիական մագմետներին, էոլացիներին, կարիացիներին, լիւիացիներին, միլիացիներին եւ պամփիլիացիներին, այսինքն՝ զբաղեցնում էր Փոքր Ասիայի արեւմտեան եւ հարաւարեւմտեան շրջանները: Երկրորդը բովանդակում էր միւսիացիներին, լիւիացիներին, լապոններին, կաբալներին եւ հիւստեմներին՝ զբաղեցնելով առաջին սատրապութիւնից դէպի հիւսիս ընկած հողերը: Երրորդ սատրապութեան մէջ էին մտնում, այսպէս կոչուած, աշակողմեան հելլենապոնացիները, փոնիացիները, Ասիայի թրակացիները, պամփիլիացիները, մարիանդիները եւ սիրիացիները (փոքրասիական), որոնք բնակուում էին Փոքր Ասիայի հիւսիս-արեւմտեան եւ կենտրոնական շրջաններում: Հարուստ եւ բարգաւաճ Կիլիկիան կազմում էր մէկ առանձին սատրապութիւն՝ թուով չորրորդը, որի տարածքը ձեւաւորուել էր դեռեւս Կիլիկիայի թագաւորութեան գոյութեան շրջանում: Ասորիքը Կիլիկիայի սահմանազխին գտնուող Պոսիդէոս քաղաքից մինչեւ Եգիպտոս, ներառեալ ամբողջ Փոնիկիան եւ Պաղեստինեան Սիրիան կամ Ասորիքը եւ Կիպրոսը, կազմում էր հինգերորդ սատրապութիւնը, իսկ Եգիպտոսը Լիբիայի, Կիրենէի ու Բարկայի հետ՝ վեցերորդը¹²:

Թերեւս կարող է գարմանք յարուցել մեր կողմից սատրապութիւնների հարցին այսպէս մանրակրկիտ անդրադառնալը, սակայն հետագայ քննութիւնը հասկանալի կը դարձնի դրա անհրաժեշտութիւնը: Թուում է, թէ այս յիշատակուած 6 սատրապութիւնից յետոյ պէտք է նկարագրուէին Հայաստանը, Այսրկովկասեան երկրները, Միջագետքը, Մարաս-

տանը եւ այլն: Սակայն եօթերորդ սատրապութիւնը յայտնուում է կայսրութեան ծայր արեւելեան շրջաններում՝ իր մէջ ունենալով Սաստագիտներին, զանդարիներին, դադիկներին եւ ասպարիտներին: Ուսումնասիրողները նշուած սատրապութիւնը տեղադրում են Փեշավարի եւ արդի Աֆղանստանի հարաւային շրջանում¹³: Ութերորդ սատրապութիւնը զբաղեցրել է Օռշի կամ Սուգայի շրջանը եւ կիսսիեցիների երկրի մնացած մասը, այսինքն՝ կարծես ցուցակը կորցնում է իր տրամաբանական շարունակութիւնը՝ թուիչք կատարելով Փեշավարի շրջանից էլամ՝ ներկայիս Իրանի հարաւ-արեւմտեան հատուածը: Այնուհետեւ ցուցակի աշխարհագրական հերթականութիւնը վերականգնուում է: Իններորդ սատրապութիւնը գտնուել է Սուգիանայի կամ Օռուշանի հարեւանութեամբ՝ զբաղեցնելով Բարեյունը եւ Ասորեստանը, տասներորդը՝ յիշեալ երկուսի հարեւանութեամբ, ընդգրկելով Ագրատանան (ներկայիս Համադանը), Մարաստանի մնացած մասը, պարիկաններին եւ օրթոկորիքանտիներին, տասնմէկերորդը՝ Մարաստանի հիւսիսում, ներառելով կասպերին, պասիկներին, պանտիմաթներին եւ դարեյսներին: Տասներկուերորդ սատրապութիւնը, որ ներառնում էր բակտրիացիներից մինչեւ Այգլեր ընկած երկիրը, այլ խօսքով՝ Ամուդարնա գետի վերին հոսանքի շրջանը կամ Հիւսիս-արեւելեան Աֆղանստանը շրջակայ տարածքներով, յայտնուում է եօթերորդ սատրապութեան հարեւանութեամբ¹⁴: Հերոդոտեան ցուցակի քարտէզագրումը, կամայ թէ ակամայ, ստիպում է մտածել, որ VII-XI սատրապութիւնների կազմաւորումը կատարուել է վարչական վերակառուցումների երկրորդ փուլում: Արտաքնապէս այս խմբին կարծես թէ պէտք է միացնել նաեւ տասներկուերորդ սատրապութիւնը, սակայն

այդ տրամաբանական կլինէր միայն այն դէպքում, եթէ վերջինս ցուցակում զբաղեցնէր ութերորդ եւ ոչ թէ տասներկուերորդ տեղը: Ուստի մնում է ենթադրել, որ պարսից արքունիքը, ինչ-ինչ շարժառիթներից ելնելով, վարչական վերակառուցումներն իրականացրել է տէրութեան արեւելեան լեռնային մի հատուածում եւ Պարսքից արեւմուտք ու հիւսիս ընկած երկրներում:

Վարչական վերակառուցումների երրորդ փուլում կազմաւորուում են տասներկուերորդ եւ տասներեքերորդ սատրապութիւնները, որոնցից վերջինը զբաղեցնում էր Հայաստանի եւ Պակտիկէ երկրի (իմա՝ Պատուկա) տարածքը՝ ծաւալուելով մինչեւ Եւքսինեան Պոնտոսի կամ Սեւ ծովի ափերը: Չորրորդ փուլում ձեւաւորուում են XIV-XVII սատրապութիւնները, որոնք տարածուում էին Արալեան ծովի ափերից մինչեւ Պարսից ծոց եւ Հնդկական ովկիանոս: Վարչական վերակառուցումների վերջին փուլում կազմուում են տասներկուերորդ, տասներեքերորդ եւ քսաներորդ սատրապութիւնները, որոնցից առաջինը, ինչպէս նշել ենք, ընդգրկում էր մատիեմներին, սասպեյրներին եւ ալարոդներին, երկրորդը՝ մոսքերին, տիրարեմներին, մակրոններին, մոսիոնյաններին եւ մարերին, իսկ վերջինը՝ հնդիկներին¹⁵:

Թէ ինչո՞վ էր պայմանաւորուած նման հերթականութիւնը, անշուշտ առանձին ուսումնասիրութեան նիւթ է, որը քիչ է առնչուում մեր բուն խնդրի հետ: Տուեալ դէպքում մեզ համար կարեւորը վարչական վերակառուցումների փուլերի բացայայտումն է: Ոչ պակաս կարեւոր է նաեւ այն հանգամանքը, որ տասներկուերորդ եւ տասներեքերորդ սատրապութիւնները ստեղծուել են միաժամանակ՝ Հայաստանում սատրապութիւն ձեւաւորելուց անհամեմատ ուշ:

Կարելի է աւելացնել նաեւ, որ պարսկական վարչակարգի հաստատումը բազմամարդ բնակչութիւն ունեցող հնդկական հողերում, ինչպէս նաեւ սկիւթական ցեղերով հեղեղուած այսրկովկասեան երկրներում մեծ դժուարութիւն էր ներկայացնում, որի պատճառով էլ արքունիքը դրանց վարչական վերակառուցմանը ձեռնամուխ է լինում ամենավերջինը եւ այն էլ ոչ արմատական ձեւով, քանի որ, ըստ երեւոյթին, տասներեքերորդ սատրապութեան ազդեցութեան ներքոյ գտնուող կոլխերի երկիրը եւ նրանց հարեւան ցեղերը, որոնք բնակուում էին մինչեւ Կովկաս լեռը, որը պարսից պետութեան սահմանն էր, միայն ընծաներ էին մատուցում պարսից արքունիքին՝ հազար տղայ եւ հարիւր աղջիկ եւ այն էլ հինգ տարին մէկ անգամ¹⁶: Ապահարկ էին եւ լոկ ընծաներ էին մատուցում նաեւ արաբները, Եգիպտոսին սահմանակից եթովպացիները եւ որոշ այլ ցեղեր¹⁷:

Տասներկուերորդ սատրապութիւնը Հայաստանի տարածքում տեղադրող գիտնականները առաջնորդուում են հետեւեալ հանգամանքներով: Յնուելով Հերոդոտոսի տուեալների վրայ՝ նրանք մատիեմներին տեղադրում են Ուրմիոյ լճի աւազանում եւ շրջակայքում, սասպեյրներին դիտում են որպէս քարթուելալեզու ժողովուրդ եւ տեղորոշում Սեւ ծովի հարաւարեւելեան անկիւնի մերձակայքում՝ Ճորխի աւազանում, իսկ ալարոդներին նոյնացնում են ուրարտացիների հետ, գտնելով, որ վերջիններս զբաղեցրել են Վանայ լճի աւազանի արեւելեան մասը եւ Երասխի աւազանը¹⁸: Այս տեսակէտն այնքան է արմատացել հայագիտութեան մէջ, որ դրանից ամէն մի շեղում խիստ բացասաբար է ընկալուում ուսումնասիրողների կողմից: Սակայն մենք կը փորձենք Հերոդոտոսի եւ այլ հեղինակների

տուեալներին հիման վրայ հերքել նման մօտեցումը եւ ընթերցողի դատին յանձնել տեղորոշման միանգամայն այլ տարբերակ:

Մատիեճճներ: Սկսենք, ինչպէս Հերոդոտոսի սատրապուլթիւնների նկարագրութեան մէջ, մատիեններից, որոնց Պատմահայրը, այլեւայլ կապակցութեամբ, անդրադառնում է մի քանի անգամ: Հերոդոտոսը հաւաստում է, որ «մեղական տէրութեան եւ լիւզիական տէրութեան միջեւ սահմանը Հալիւս գետն էր, որ հոսում է Հայկական լեռներից Կիլիկիայի միջով՝ այնուհետեւ (հոսում է) աջից մատիեճճերից եւ ահակից փոխադրացիներին ունենալով»¹⁹: Յիշատակութեան մատիենները չեն կարող որեւէ ձեւով առնչուել տասնութերորդ սատրապութեան մատիեններին, որովհետեւ բնակւում են Հալիւս կամ Հալիս գետի աւազանում: Պատմահօր մէկ այլ տեղեկութեամբ յոյն-պարսկական կռիւներին մատիեճճերը մասնակցել են Պափլագոնացիների հետ մէկտեղ եւ «Լիգիացիների, մատիեճճերի, մարիանդիների եւ սիրիացիների (փոքրասիական - Յ. Բ.) հանդերձանքը նոյնական էր պափլագոնականի հետ: Այս սիրիացիներին պարսիկներն անուանում են կապադովկացիներ: Պափլագոնացիներին եւ մատիեճճերին առաջնորդում էր Դարեհի եւ Արտիւստոնէի որդի Գորբիւսը»²⁰: Առանձնապէս չխորանալով յիշեալ ցեղերի տեղադրութեան խնդրում՝ ստիպուած ենք խոստովանել, որ սոյն յիշատակութեան մատիեճճերը նոյնանում են Հալիսի աւազանի մատիեններին, ուստի եւ չեն կարող կապ ունենալ տասնութերորդ սատրապութեան հետ: Խնդրիս մէջ բարդութիւն է

մտցնում Հերոդոտոսի յաջորդ հաղորդումը, ըստ որի «կիլիկացիներին յաջորդում են արմենները, որոնք նոյնպէս առատ հողեր ունեն. արմեններից յետոյ, ահա այստեղ բնակւում են մատիեճճերը: Յաջորդը, ահա, Կիսսիա երկիրն է, որտեղ Քոասպէս գետի վրայ գտնւում է ահա Սուսա (քաղաքը), որտեղ ապրում է մեծ արքան, եւ որտեղ գտնւում են նրա գանձերը»²¹: Ստացւում է, որ մատիենները բնակեցրել են արմեններից մինչեւ Կիսսիա տարածուող երկիրը, այսինքն՝ բնակուել են Ասորեստանում: Այս տեղեկութիւնը կարծես թէ իր հաստատումն է գտնում Հերոդոտոսի այլ վկայութիւններում, որոնցից մէկի համաձայն «Գիւնդէս գետը, որը բխում է Մատիենական լեռներից, հոսում է Դարդանների երկրի միջով ու թափւում մէկ այլ՝ Տիգրիս գետը»²². Իսկ ըստ միւսի՝ «Արմենիայից ճանապարհը մտնում է Մատիենէ, որտեղ կայ երեսուն չորս կայան, հարիւր երեսուն յոթ փարսախի վրայ: Այս երկրի միջով հոսում են չորս նաւարկելի գետեր, որոնք անհրաժեշտ է նաևով անցնել: Այդ գետերից առաջինը Տիգրիսն է. երկրորդը եւ երրորդը համանուն են, բայց նոյն գետերը չեն եւ նոյն վայրից չեն բխում. քանզի յիշեալ գետերից առաջինը բխում է Արմենիայից, իսկ երկրորդը՝ Մատիենից: Չորրորդ գետը կոչւում է Գիւնդէս, որը Կիւրոսը բաժանել էր երեք հարիւր վաթսուն ջրանցքների: Այս երկիրն անցնելուց յետոյ ճանապարհը մտնում է Կիսսիայի երկիրը, ... մինչեւ Քոասպէս գետը, որը նոյնպէս նաւարկելի է: Այս գետի վրայ է գտնւում Սուսա քաղաքը»²³: Վերջին տեղեկութիւնը, ինչպէս ճիշտ նկատել են ուսումնասիրողները, մեզ է հասել ոչ անաղարտ վիճակում: Երկու նոյնանուն գետերի անունը, որ հետազօտողներն իրաւացիորէն վերա-

կանգնում են «Ջաբատ» եւ նոյնացնում Մեծ Ջաւ ու Փոքր Ջաւ գետերին, մեզ չի հասել²⁴: Սակայն անկախ դրանից, տարակոյս չկայ, որ Մատիենէ երկիրը յիշեալ վկայութիւնների մէջ եւս համապատասխանում է Ասորեստանին, ուստի եթէ անգամ ընդունենք, որ Ասորեստանը կոչուել է նաեւ Մատիենէ, ապա Ասորեստանի եւ Բաբելոնի առանձին սատրապութիւն կազմելը անհնարին է դարձնում այս երկրի կամ նրա բնակիչների պատկանելիութիւնը տասնութերորդ սատրապութեանը:

Հարցիս մէջ առանձին յստակութիւն չի մտցնում նաեւ Հերոդոտոսի մէկ այլ վկայութիւնը, որը իւրովի է մեկնաբանել Ստրաբոնը: Ըստ Պատմահօր՝ Արաքս գետը սկիզբ է առնում Մատիենեան լեռներից, որտեղից հոսում է եւ Գիւնդը (Գիւնդէս), որը Կիւրոսը բաժանել է 360 ջրանցքների: Ըստ որում Արաքսը, գալարուելով, առաջացնում է 40 բազուկներ, որոնք, բացի մէկից, կորչում են ճահիճներում, որտեղ մարդիկ սնւում են հում ձկներով եւ կրում փոկամորթուց պատրաստուած հագուստներ: Արաքսի միակ գետաբերանը, ըստ հեղինակի, դուրս է գալիս Կասպից ծով²⁵: Նշուած տեղեկութիւնները Ստրաբոնի մօտ ստացել են ներքոյիշեալ տեսքը. Արաքսը հոսում է մատիենների մարզից, այնուհետեւ բաժանւում է 40 բազուկների՝ բաժանելով սկիւթներին բակտրիացիներից²⁶: Տեղեկութիւնների նմանօրինակ խիստ խառնափնթոր զուգակցում այնքան էլ յաճախ չի պատահում: Ելնելով Գիւնդէսի յիշատակութիւնից՝ պէտք է ենթադրել, որ նշուած տեղեկութեան մէջ Արաքսը Տիգրիսի վտակներից է, որը կարող է համապատասխանել ներկայիս Տաուկ գետին (Աղսու վտակով), որը Գիւնդէսից (ներկայիս Դիալա գետը) հիւսիս թափւում է

Տիգրիսի մէջ: Սակայն զուտ տեսականօրէն Մատիենեան լեռներից սկիզբ առնող գետը կարող էր թափուել նաեւ Կասպից ծով, եթէ ակունքները գտնուէին լեռների արեւելեան լանջերին: Այդ դէպքում Արաքսը կարող է նոյնանալ Ամարդոս կամ այժմեան Սեֆիդ-ուուդ գետին, որը ներկայումս վերին Հոսանքի շրջանում կոչւում է Կըզըլ-Ուզեն: Նման ենթադրութիւնն ամրապնդւում է Սեֆիդ-ուուդի ճիւղաւորուած գետաբերանով եւ ծովին մերձակայ տարածքների ճահճուտներով: Եթէ նման ենթադրութիւնը ճիշտ է, ապա Սեֆիդ-ուուդը Ամարդոսից բացի ունեցել է նաեւ Արաքս անունը կամ էլ յոյները դրան Արաքս են անուանել: Սակայն գետի Կասպից ծով թափուելու իրողութիւնը, գետաբազուկների մէկից բացի ճահիճներում կորչելը, որը յատուկ չէ Ամարդոսին, ինչպէս նաեւ Արաքսը սկիւթներին բակտրիացիներից բաժանող գետ դիտելը մտածել են տալիս, որ տեղեկութիւնը կարող է վերաբերել նաեւ ներկայիս Ամու-դարեային կամ պատմական Օքսոսին, որը հնում թափւում էր Կասպից ծով: Անկախ այն հանգամանքից, թէ Արաքսի հետ կապուած տեղեկութեան մէջ գետը նոյնանում է Տաուկին, թէ Սեֆիդ-ուուդին, Մատիենական լեռներն իրենց տեղադրութեամբ համահունչ են Հերոդոտոսի միւս տուեալներին, որոնք վերը քննեցինք, ուստի դիմենք այլ սկզբնաղբիւրների տեղեկութիւններին:

Ստրաբոնը, որն, ի տարբերութիւն Պատմահօր, Մատիենեան լեռների, գետի սկիզբը համարում էր մատիենների մարզը, Մատիենէ երկրի եւ մատիենների մասին ունի եւս մի քանի յիշատակութիւններ: Այսպէս, Հայաստանի, Մատիենէի եւ Ստորին Փոխադրացի համատեղ յիշատակութիւնը՝ կապուած երաշտի հետ²⁷, պարզորոշ հաւաստում է, որ այդ դէպ-

քում խօսքը վերաբերում է հալիսեան կամ հալիսեան մատիեններին: Եթէ անգամ կասկածի տակ առնենք դրա պարզորոշութիւնը, այնուամենայնիւ, նշուած կոնտեքստում այդ առաւել հաւանական եզրակացութիւնն է: Սակայն, շատ չանցած, Ստրաբոնը Մատիենէն համարում է Միդիայի երկրամաս²⁸ հաւաստելով կրկին անգամ այդ մասին իր աշխատութեան XI գրքում²⁹: Անդրադառնալով Կասպից կամ Վրկանից ծովի շրջակայքում ապրող ժողովուրդներին՝ յոյն աշխարհագրագէտը գրում է. «Վրկաններից յետոյ ծովի շրջագծով բնակւում են ամարդները, անարիակները, կատիշները (կադուսիները), ադվանները (ալքանները), կասպերը, ուիտիները (կամ վիտիները) եւ հնարաւոր է, ընդհուպ մինչեւ սկիւթները, այլ ժողովուրդներ: Վրկանների միւս կողմում ապրում են դերքիկները, իսկ կատիշները սահմանակցում են մարերիս եւ մատիաններին՝ Պարաքոթրէս լեռան ստորոտին»³⁰: Դիմելով ատրպատականեան Մարաստանի աշխարհագրութեանը՝ հեղինակն այն տեղադրում է Հայաստանից եւ Մատիանէից արեւելք, Մեծ Մարաստանից արեւմուտք եւ Մատիանէից ու Մեծ Մարաստանից հիւսիս, իսկ հարաւում յարակից է համարում Վրկանից ծովի խորշին մերձակայ մարգերին ու Մատիանէին³¹: Նա նաեւ վկայում է, որ Մարաստանը բարձր լեռնային ու ցուրտ երկիր է, եւ նրա լեռները էկրատանայից, Ռագայից եւ Կասպիական դռներից ձգւում են մինչեւ Մատիանէ ու Հայաստան³²: Եթէ անգամ ընդունենք, իսկ կասկածելու առանձին պատճառներ չկան, որ Մատիանէն Մարաստանի մասն է, ապա հեղինակի կողմից վերջինիս տեղադրութիւնը Պարաքոթրէս լեռան ստորոտում հակասում է այլ սկզբնաղբիւրների տեղեկութիւններին: Խնդիրն այն է,

որ յոյն աշխարհագրագէտի այլ տեղեկութիւնների համաձայն, Պարաքոթրէսի տակ պէտք է հասկանալ, տուեալ դէպքում, ներկայիս Թալիշի եւ Գիլանի լեռները, ինչպէս նաեւ դրանց շարունակութիւնը, հետեւաբար կատիշները, որոնց յոյները նոյնացնում էին գելերի հետ, սահմանակցելով մատիաններին, պէտք է տարածուէին մինչեւ Մատիանէ կամ Ուրմիոյ լիճը կամ էլ մատիանները պէտք է տարածուէին մինչեւ Արդաբիլի (հնում՝ Արտաւեստ) եւ յարակից շրջանների տարածքը: Տեսականորէն այդ թերեւս հնարաւոր է, սակայն նշուած դէպքում պարզապէս հակասութիւն է առաջ գալիս Ստրաբոնի կողմից ատրպատականեան Մարաստանը կամ պարզապէս Ատրպատականը Հայաստանից ու Մատիանէից արեւելք եւ Մատիանէից ու Մեծ Մարաստանից հիւսիս տեղադրելուն: Այս իրողութեանը մենք դեռ կանդորդառնանք, այժմ լոկ նշենք, որ վերջին երեք տեղեկութիւնների մէջ, թերեւս, միակ տարբերակիչ իրողութիւնն այն է, որ մի դէպքում մատիանները յիշուում են որպէս ցեղ, իսկ միւս դէպքերում խօսքը գնում է Մատիանէ երկրի մասին: Հարկ է նշել, որ Մատիանները, որպէս ցեղ, Ասորեստանի տարածքում կամ Ուրմիոյ լճի աւազանի շրջանում գրեթէ չեն յիշուում, եւ նշուած տարածքները հանդէս են գալիս որպէս Մատիանէ կամ Մատիանէ երկիր: Ուրմիոյ լճի անունը մեզ է հասել Մարտիանէ եւ Մանտիանէ³³ գրութիւններով, որոնցում ե՛ւ «ն»-ն, ե՛ւ «ր»-ն աճական են: Մարտիանէին դեռ կ'անդրադառնամ, սակայն աւելորդ չեմ համարում նշել, որ Ուրմիոյ լիճը ամասիացի աշխարհագրագէտը յիշատակում է ոչ միայն որպէս Հայաստանի լիճ՝ կոչելով այն Մանտիանէ, այլեւ Մարաստանի կազմում՝ Σπαυτα անունով³⁴, որն ուսում-

նասիրողներն իրաւացիորէն սրբագրել են՝ Καπαυτα (Կ. Միւլլեր) կամ Καπαυταν (Կրամեր եւ ուրիշներ)³⁵: Դժուար չէ տեսնել, որ հայերի կողմից լճին տրուած կամ հայերի կողմից մէկ այլ ժողովրդից փոխառնուած Կապուտան անունը պարզապէս Մանտիանէի թարգմանութիւնն է, քանի որ Ստրաբոնի հաւաստմամբ Մանտիանէն նշանակել է կապոյտ: Կապուտան անունը իր կառուցուածքով իրանական է, սակայն շատ հաւանական է, որ լճին Կապուտան անունը տուել էին հայերը՝ «կապոյտ» գոյնանունը շատ աւելի հին ժամանակներում փոխառած լինելով իրանցիներից: Այս եզրակացութիւնն ամրապնդւում է, թերեւս, այն փաստով, որ իրանախօս Ատրպատականի նկարագրութեան առիթով լճանունը յիշատակւում է ոչ թէ Կապուտան, այլ Մանտիանէ գրութեամբ: Այսպէս են ծնուել Ուրմիոյ լճի հին անունները, թէ ոչ, շատ էլ կարեւոր չէ, բայց անտարակոյս է մի բան, որ «կապոյտի» գաղափարը գալիս էր հէնց մատիեն կամ մատիան ցեղանունից: Այժմ քննութեան առնենք Պլինիոս Աւագի եւ Կլաւդիոս Պտղոմեոսի հաղորդումները, որոնք, ըստ իս, որոշակի հետաքրքրութիւն են ներկայացնում: Որոշ նկատառումներից ելնելով՝ մենք խախտում ենք ժամանակագրական յաջորդականութիւնը եւ առաջինն անդրադառնում ենք ալեքսանդրացի մեծ աշխարհագրագէտի տուեալներին, որոնք հետաքրքիր նորոյթներ են պարունակում: Պտղոմէոսի մօտ Մարտիանէ անունով հանդիպող Ուրմիոյ լիճը տեղադրւում է Կադուսիայում կամ Կատիշների երկրում³⁶, որ հակասութեան մէջ է Ստրաբոնի՝ Մատիանէն Կատիշների հարեւանութեամբ, Պարաքոթրէս լեռան ստորոտում ցոյց տալուն: Աշխարհագրագէտի

տեղեկութիւնների քարտեզագրումը բացայայտում է մի հետաքրքիր իրողութիւն եւս. լճի շրջակայքում զարմանալիորէն բնակավայրեր չեն յիշատակւում: Հեղինակի մէկ այլ հաղորդմամբ՝ «Մեդիայի արեւմուտքում, Հայքին մօտ գտնուող մասում, բնակւում են կասպիացիները (իմա՝ կասպերը - Յ. Բ.), որոնցից ներքեւ գտնուում է Մարտիանէն՝ Ասորեստանի ողջ կողքի երկայնքով: Մովամերձ շրջաններում կադուսիացիները, որոնք կոչւում են նաեւ լեգեր (իմա՝ գելեր - Յ. Բ.), եւ դրիբիկներ, որոնցից յետոյ մինչեւ երկրի խորքերը տարածւում են ամարիակները (իմա՝ անարիակները - Յ. Բ.) եւ ամարդները (կամ մարդերը): Ներսի՝ դէպի կադուսիացիների գաւառն ընկած մասերը զբաղեցնում են կարդուքները եւ Մարունդները՝ մինչեւ Մարտիանէ լիճը: Գելերից ներքեւ մարգասներն են, որոնցից յետոյ Տրոպատենէն, որը տարածւում է մինչեւ ամարիակները (իմա՝ անարիակները - Յ. Բ.)»³⁷: Պտղոմէոսի երկի տուեալների մանրակրկիտ քննութիւնը ոչ միայն կապուած է մեծ ջանքերի ու ժամանակի հետ, այլեւ դուրս է մեր աշխատանքի անմիջական շահագրգռութիւնների շրջանակից, ուստի մենք կ'անդրադառնանք միայն մի քանի հարցադրումների: Նախ եւ առաջ հարկ է ընդգծել, որ Մարաստանի պտղոմէոսեան նկարագրութիւնն անհամեմատ հին է, քան նրա ապրած ժամանակաշրջանը: Մ. թ. II դարում Մարաստանն արդէն որպէս ինքնուրոյն պետութիւն գոյութիւն չունէր, իսկ եթէ գոյութիւն էլ ունենար, ապա նրա կազմում չէր գտնուի Կասպքը, որը, բոլոր սկզբնաղբիւրների համաձայն, Արտաշէս Ա-ից (189-160) սկսած՝ Մեծ Հայքի թագաւորութեան մաս էր կազմում: Ինչպէս վերը տեսանք, ամասիացի յոյն աշխարհագրա-

գէտը Ուրմիրոյ լիճը մի դէպքում վերագրում էր Մեծ Հայքին, իսկ միւս դէպքում՝ Մարաստանին: Պտղոմէոսի մօտ եւս Ուրմիրոյ լիճը հանդիպում է եւ Մեծ Հայքի եւ Մարաստանի նկարագրութեան մէջ³⁸: Հասկանալի է, որ II դարում, երբ Մեծ Հայքում իշխում էին Հայացած կամ Հայացող Պարթեւ Արշակունիները, որոնք, Պարթեւական թագաւորութեան համակարգում երկրորդութեան իրաւունքն ունենալով, տիրում էին Ատրպատականի ձեռական իշխանութեան երկրին³⁹, Ուրմիրոյ լճի աւազանը ոչ մի կերպ չէր կարող պատկանել Մեդիա-Մարաստանին: Յիշեալ եզրակացութիւնն ամրապնդւում է Պտղոմէոսի երկի մէկ այլ տեղեկութեամբ եւս, ըստ որի Մարաստանի մէջ էին մտնում նաեւ կարողութեւնը՝ իրողութիւն, որ հնարաւոր էր Մարկոս Անտոնիոսի պարթեւական արշաւանքից յետոյ կամ էլ մեր թուականութեան արշալոյսին, երբ Հռոմը Հայկական գահին էր բազմեցրել Ատրպատականի թագաւորներին: Գոնէ մեր կարծիքով՝ առաւել հաւանական ժամանակաշրջանն, այնուամենայնիւ, Անտոնիոսի Արեւելքում գտնուելու տարիներն են, երբ էլ, թերեւս, կազմուել է Մարաստանի նկարագրութիւնը: Դրա օգտին է խօսում Կարդուքների երկրի Մարաստանի մէջ գտնուելը, որով Հայաստանը գրկւում էր Պարթեւական թագաւորութեան հետ անմիջական հարեւանութիւնից եւ դրանով իսկ համագործակցելու եւ ռազմական օժանդակութիւն ստանալու հնարաւորութիւնից: Հաշուի առնելով վերնաստիճանը՝ առանց կասկածի կարելի է պնդել, որ Պտղոմէոսը օգտագործել է Մարաստանի մի հին նկարագրութիւն, որը նա փորձել է յարմարեցնել այլ երկրների նկարագրութեանը եւ մոծել է աշխատութեան մէջ:

Մարաստանի նկարագրութիւնը պարունակում է նաեւ որոշ այլ անհամապատասխանութիւններ: Հեղինակը կասկածի կամ կասկածիցից հարեւանութեամբ տեղադրում է Մարտիանէն, սակայն երկու տող անց կարդուքների մերձակայքում տեղադրում է կարդուքներին եւ մարունդներին, որը Կասպքի եւ Մարտիանէի հարեւանութեան դէպքում պարզապէս բացառւում է: Առաւել եւս, որ հեղինակի միւս տեղեկութեամբ Մարտիանէն (նոյնական է Մատիանէին - Յ. Բ.) տարածուել է Ասորեստանի ողջ կողքի երկարութեամբ: Սրան համահունչ է Մատիանէի լիճը Կարդուքից տեղադրելը, որով Կասպքը կտրւում է Մատիանէից, սակայն դրանով իսկ Ուրմիրոյ լճի շրջանը հանւում է Մատիանէի կազմից, որը հաւանական է: Ինչպէս տեսնում ենք, շատ դժուար է տարածքային առումով Մարտիանէն որեւէ կերպ տեղորոշել կասպերի հարեւանութեամբ կամ էլ Պարթեւութիւն լեռների մերձակայքում: Վերջին հանգամանքի մասին ստորեւ դեռ կը խօսուի, սակայն կարող էր նշուած Մարտիանէն կամ Մատիանէն արդեօք մաս կազմել տասնութերորդ սատրապութեան: Կարծում եմ, որ աշխարհագրական առումով այդ պարզապէս անհնար է: Աւելին՝ ծանօթութիւնը Պլինիոս Աւագի տուեալներին մեզ բերում է այն մտքին, որ Պտղոմէոսի տեղեկութիւնները մասամբ ծագում են լատին հեղինակի աշխատութիւնից կամ էլ երկուսն օգտուել են մի ընդհանուր աղբիւրից: «Բնապատմութեան» հեղինակը նշում է, որ «մարտիանէները, արսերը, գելերը, որոնց յոյներն անուանում էին կադուսիացիներ, մատիանէները»⁴⁰ գտնւում էին Մարաստանի սահմաններում: Եւ, իրօք, ըստ Պլինիոսի՝ մատիանէները կարդուքների հարեւանութեամբ են յիշուում, որոնք,

ինչպէս ասուեց, նոյնական էին գելերին: Նման տեղադրութիւնը տեսականօրէն հնարաւոր է եւ Ուրմիրոյ լճի մերձակայքում եւ Պարթեւութիւն կամ, ըստ հայկական աղբիւրների, Պատիժահար լեռան ստորոտում: Ելնելով նախորդ վկայութիւններից՝ երկրորդի հնարաւորութիւնն այնքան աննշան է, որ կամայ թէ ակամայ հարց է ծագում, թէ ինչո՞ւ այնուամենայնիւ յիշատակութիւններ են պահպանուել մատիանէների Պարթեւութիւն լեռան ստորոտում բնակուելու վերաբերեալ: Թերեւս այդ կապուած է մարտիանէներից ցեղի իրական գոյութեան հետ: Պլինիոս Աւագի կողմից մարտիանէների յիշատակութիւնը, եթէ այն, իհարկէ, զուտ գրչական սխալ չէ, եւ նրանց անուան խիստ մերձակցութիւնը մատիանէ անուանմանը մտածել են տալիս, որ եղել է մատիանէների կամ մարտիանէների ազգակից մի ցեղ մարտիանէներ անունով, որն իսկապէս զբաղեցրել է Պարթեւութիւն լեռան մերձակայքը՝ դառնալով յոյն հեղինակների հակասական ընկալումների պատճառ:

Թւում է թէ մենք կանգնած ենք փակուղու առաջ, որովհետեւ ո՛չ Հալիսեան մատիանէները եւ ո՛չ էլ Ուրմիրոյ լճի մերձակայքում գտնուող Մատիանէ երկիրը չէին կարող մտնել տասնութերորդ սատրապութեան մէջ: Եթէ առաջինը պարզապէս անհնար է, ապա երկրորդի տեսական հնարաւորութեան դէպքում, հաշուի առնելով ցայսօր ընդունուած սասպերների տեղադրութիւնը Սպերի շրջանում, Ուրմիրոյ լճի շրջանից մինչեւ Սպեր ընկած ահռելի տարածքում հազիւ թէ չգտնուէին այլ ցեղախմբեր եւս, որովհետեւ, եթէ սասպերները, ընդամէնը Սպերը բնակեցրած ժողովուրդ լինելով, յիշուում են բազմիցս, ապա արարողները, որոնք պէտք է զբաղեցնէին յիշեալ ահ-

ռելի տարածքը, մոգական գաւազանով անհետանում են տարածաշրջանի էթնիկական քարտէզից: Այսուհանդերձ, մատիանէների մասին հրաշքով պահպանուել է եւս մէկ հաղորդում, որն էապէս տարբերւում է նախորդներից:

Հեկատոնոս Միլետացու «Երկրագրութեան» մեզ հասած ծագկաբաղ հատուածներից մէկում, որը պահպանուել է Ստեփանոս Բիւզանդացու երկում, ասում է, որ Մոսքերը կոլիսական ցեղ են եւ հարեւան մատիանէների⁴¹: Այս հաղորդումից պարզ է դառնում, որ Մատիանէական ցեղախմբի մի հատուածը բնակուել է Այսրկովկասում, ներկայիս Վրաստանի Հանրապետութեան հարաւարեւմտեան շրջաններում հաստատուած մոսխերի կամ մոսքերի հարեւանութեամբ: Այս տեղեկութեան մատիանէներից չի կարելի նոյնացնել փոքրասիական մատիանէներից, որովհետեւ նրանց հարեւան Մոսքերը կոլիսական ցեղ են: Հասկանալի է, որ նման մօտեցման դէպքում մատիանէների բնակութեան շրջանը կարելի է տեսնել եւ մոսքերից հիւսիս եւ հարաւ ու արեւելք, սակայն, ի նկատի առնելով նրանց կոլիսական ժողովուրդ լինելը, առաւել հաւանականն անշուշտ նրանց Մոսքերից հիւսիս տեղադրելն է, որը ստորեւ կը փորձենք հիմնաւորել: Կայ մի հանգամանք եւս: Տասնութերորդ սատրապութեան մէջ մատիանէների առաջինը յիշատակելը ենթադրում է նրանց տեղորոշումը սասպերներից արեւմուտք, որը վերջիններիս Սպերի շրջանում տեղադրելու դէպքում չի հաստատուում ոչ մի սկզբնաղբիւրով, կամ էլ սասպերներից հարաւ: Վերջին եզրակացութեանը յանգել են մի շարք ուսումնասիրողներ: Ի. Զաւախիշւիլին մատիանէներից փորձում էր տեղադրել Բասեան գաւառի մերձակայքում, սասպերներից արեւելք, Ս. Զանաշիան եւ Գ.

Մեկի քիչ-իչին՝ սասայեյրաներից հարաւ եւ վանայ լճից արեւմուտք ու հիւսիս-արեւմուտք, Ի. Դեակոնովը՝ Արաքս գետի ակունքների շրջանում եւ Ն. Խազարաձէն՝ Արաքս գետի վերին հոսանքի շրջանում, սասայեյրաների հարեւանութեամբ⁴²: Աւելորդ է ասել, որ այս տեսակէտի կողմնակիցների հիմնական կռուանները Հերոդոտոսի կողմից Արաքսի ակունքները Մատիենների երկրում տեղորոշելն է, Հեկատէոս Միլետացու վերը բերուած տեղեկութիւնը եւ, իհարկէ, որ շատ կարեւոր է մատիեններին հէնց նշուած շրջանում տեսնելու մեծ ցանկութիւնը: Արաքսի խնդիրը մենք քննարկեցինք եւ պարզ դարձաւ, որ այն ոչ մի կերպ չի նոյնանում հայկական Արաքս-Երասխին, ուստի մնում է քննարկել հարցը Հեկատէոսի տեղեկութեան լոյսով՝ ներառելով մեզ հասած բոլոր փաստերը: Հերոդոտոսը, անդրադառնալով տասնիններորդ սատրապութեանը, գրել է. «Մոսքերի, տիրարեաների, մակրոնների, մոսսիոնյանների եւ մարերի վրայ սահմանուեց երեք հարիւր տաղանդ (հարկ). սա տասնիններորդ նահանգն էր»⁴³: Այս տեղեկութիւնը վերլուծելու համար անհրաժեշտ ենք համարում անդրադառնալ Քսենոփոնի «Անաբասիս»-ի տուեալներին, որոնց համաձայն մինչեւ մակրոնները, սրանցից արեւմուտք Մոսսիոնյանները, որոնց ենթակայութեան տակ էին նրանցից արեւմուտք տեղակայուող փոքրաթիւ խալիւքները եւ վերջիններից էլ արեւմուտք տիրարենները⁴⁴: Ցեղերի հերոդոտեան նկարագրութեան եւ «Անաբասիս»-ի տուեալների համադրումը մեզ թոյլ է տալիս ասելու, որ ցեղերի հերոդոտեան շարքն ունի աշխարհագրական հերթականութիւն: Մարերի հարեւանութիւնը մոսսիոնյանների մեզ իրաւունք է տալիս եզրակացնելու, որ նրանք նոյնանում են մոսսիոնյանների ենթակայութեան

տակ գտնուող խալիւքներին⁴⁵: Եթէ մի պահ վերանանք տիրարեններից, ապա հերոդոտեան մոսքերը պէտք է տեղադրուեն ցեղերի շարքի ծայր արեւելեան հատուածում: Սակայն խնդիրն այն է, որ, Քսենոփոնի համաձայն, նշուած տարածքում գտնուում էին այսրկովկասեան խալիւքները: Այս իրողութիւնը չի վրիպել ուսումնասիրողների ուշադրութիւնից: Ի. Դեակոնովը միանգամայն իրաւացիորէն նշել է, որ կարծես թէ մոսք անուանումը խալիւք-խալդայների մէկ այլ անուանումն է, սակայն տարօրինակ ձեւով մոսքերին նոյնացնում է ոչ թէ արեւելեան, այլ արեւմտեան կամ պոնտական խալիւքների հետ⁴⁶: Իրականում, ինչպէս դժուար է բզրակացնել ցեղանունների շարքից, եթէ մոսք-խալիւք նոյնացումը հնարաւոր է, ապա միայն արեւելեան խալիւքների դէպքում⁴⁷: Պլինիոս Աւագը, մի կապակցութեամբ յիշելով «Պոնտոսի ամենանշանաւոր Փասիս (իմա՝ Ռիոն) գետը», գրում է, որ՝ «Այն սկիզբ է առնում մոսքերի մօտ եւ 38,5 մղոն երկայնքով մատչելի է ցանկացած մեծութեան նաւերի համար» եւ, որ «նրա գետաբերանում գտնուում է Փասիս քաղաքը»⁴⁸: Մէկ այլ կապակցութեամբ նա նշում է, թէ «Թասիեի եւ Թրիարիեի տարածքները հասնում են մինչեւ Պարի-հեղրեան լեռները, որից այն կողմ է գտնուում Կողքիսի անապատը. նրա կողքին կերտուանցիների ուղղութեամբ բնակուում են արմենոխալիւքները եւ Մոսքերի տարածքն է՝ մինչեւ Կիւրոսի վտակ Հիբերոսը: Նրանցից ներքեւ սակասաւաններն են, այնուհետեւ՝ մակրոնները եւ Աբսարոս գետը»⁴⁹: Լատին պատմիչի երկու հաղորդմամբ էլ մոսքերը տեղադրուում են խալիւքների զբաղեցրած տարածքում, քանի որ Փասիսն, իրօք, սկիզբ է առնում խալիւքները հիւսիսից եզերող լեռներից

եւ, ամէն ինչից դատելով, խալիւք-մոսքերը տարածուում էին մինչեւ բուն Վիրքի կամ Իբերիայի սահմանը: Այսպիսով, հերոդոտեան մոսք-տիրարեն-մակրոն-մոսսիոնյան-մար շարքը, ըստ էութեան, համապատասխանում է «Անաբասիս»-ի խալիւք (=մոսք)-մակրոն-մոսսիոնյան-խալիւք (=մար)-տիրարեն շարքին: Միակ անհամապատասխանութիւնը տիրարեններն են, որոնք անհասկանալի պատճառով յայտնուում են մոսքերի հարեւանութեամբ: Կարելի է արդեօք տալ դրա բացատրութիւնը: Թերեւս, այո:

Մոսքերին սովորաբար փորձ է արւում կապելու մուշկերի հետ, որոնք առաւել հին սկզբնաղբիւրներում նոյնական էին փոխադրուածների, որոնց հնդեւրոպական լեզուաբանները պատկանելը ոչ ոք չի կասկածում⁵⁰: Այս նոյնացումը, հարկ է նշել, որ շատ կասկածելի է, որովհետեւ ասորեստանեան, թէ՛ վանեան բեւեռագիր արձանագրութիւններում, խեթական գաղափարագիր, թէ՛ եբրայեցեան տեքստերում բացակայում է «ք» կամ դրան յունական համարժէք «X» հնչիւնը, որով Մուշկուն տարբերում է «Մոսք»-ից կամ Μοσχ-ից: Եւ եթէ բոլորին քաջ յայտնի է Մուշկերի բալկանեան ծագումը, ապա մինչեւ այսօր էլ կասկածների եւ հակասական մեկնաբանութիւնների տեղիք է տալիս Մոսքերի ծագումը, որոնց անունն, ըստ իս, սերտ աղերս ունի վրայցական «մեսիս»-ի հետ, սակայն ոչ մի հիմք չկայ նրանց վրայցական ցեղ համարելու: Մոսքերը, ամէն ինչից դատելով, պատկանում էին իրանական ցեղախմբերից մէկին, ամենայն հաւանականութեամբ, սկիւթական աշխարհին: Արդէն Հեկատէոս Միլետացու հաղորդմամբ մոսքերը կոլխական ցեղ էին, որոնց վրայցականութիւնը որեւէ ձեւով կասկածի տակ չի դրւում պատմագիտական երկերում: Սակայն անտիկ հե-

ղինականների տեղեկութիւնները ըստ ամենայնի քննութիւնը պարզում է, որ կոլխները կամ, որ աւելի ճիշտ է, կոլքերը, որոնց անունը հաւաքական բնոյթ ունի, նոյնպէս պատկանել են սկիւթական աշխարհին: Յովհաննէս Կարապետեանի վերջին ուսումնասիրութիւնները ցոյց են տալիս, որ կոլխա կամ կոլխ (կոլք) անուանումը հնդիրանական է (հմտ. հնդկ. կոլխա «կոլք, եզր, անկիւն») եւ աղերս ունի հայերէն «կոլ» եւ «կոլք» բառերի հետ: Անունս տրուել է Սեւ ծովի ափերին հաստատուած իրանական ցեղերին, որոնք ունեցել են այլ անուանումներ: Ջի կարելի է համաձայնել հեղինակի հետ, որ նրանց այդ անունը տուել էին արեւմտեան կամ հարաւային հարեւանները⁵¹: Մեզ յայտնի է, թէ ինչ ցեղեր էին կազմում կոլխերի միութիւնը, սակայն գոնէ մէկի անունը յստակ է: Արեւմտեան Վրաստանի տարածքում գտնուող Փասիս քաղաքի (ներկայիս Փոթիի) շրջակայքում, Քսենոփոնի մի շատ արժէքաւոր վկայութեան համաձայն՝ բնակուել են փասիանները⁵²: Եթէ փասիանների անունն ընկալենք որպէս իրանական էթնանուն, իսկ շուտով դրանում կը համոզուենք, ապա «Փասիան» անուան վերջին «-ան»-ը պարզապէս իրանական յոգնակիակերտն է, որը չի հասկացուել յոյների կողմից: Հետեւաբար, ցեղանունն իրականում «Փասի» է, որի վրայ յոյները, աւելացնելով յունարէնին յատուկ «S» վերջաւորութիւնը, Փասիս են կոչել փասիանների քաղաքը⁵³:

Փասիանները բնակուել են ոչ միայն Արեւմտեան Վրաստանում, այլեւ Հայաստանի տարածքում: Քսենոփոնի վկայութեամբ՝ 10000 յոյները Հայաստանով նահանջելիս Երասխ գետի վերին հոսանքի եւ Ուղթիս գետի ակունքների շրջանում հանդիպեցին Փասիանների⁵⁴: Դատելով հիւսիսկովկասեան որոշ տեղանուններից՝

փաստագրերի մի հատուածն էլ բնակուել է ներկայիս կարաչայների եւ բալկարների զբաղեցրած տարածքում: Կարաչայա-բալկարական էթնոնիմների մի խումբը կազմում են այնպիսի էթնանունները, որոնք ծանօթ չեն յիշեալ ժողովուրդներին, սակայն տարածուած են նրանց շրջապատող ժողովուրդների շրջանում: Դրանք են՝ վրացական բասիանի, մեգրելական ալանի, օսական ախազ եւ օւստոն, սուանական մուսաւ (յոգնակի՝ սաիար) անունները: Ելնեղով գրաւոր սկզբնաղբիւրների տուեալներից եւ էթնիկ իրականութիւնից՝ դրանց բովանդակութիւնը միշտ չէ որ համապատասխանել է արդէ էթնիկ կացութեանը: Ն. Վոլկովան յաջողութեամբ ցոյց է տալիս, որ բալկարների ախազ (իրոնական), աւսոն (դիգորական) օսական անուանումները վառ օրինակ են մինչթուրքական էթնանունները նոր էթնոսին փոխանցելու, որը յայտնուած է այդ նոյն տարածքում: Ըստ հեղինակի՝ նոյնը կարելի է տեսնել մեգրելների կողմից կարաչայներին տրուած ալանի եւ սուանների կողմից բալկարներին տրուած միսաւ էթնանունների դէպքում⁵⁵: Բասիանի էթնոնիմը հանդիպում է վրացական XIV-XV դդ. արձանագրութիւններում: Վրացական XVII-XVIII դդ. աղբիւրները հաւաստում են Բասիանի վարչական տարածքը Դիգորի հարեւանութեամբ: 1745 թ. "Положение мест между Черным и Каспийским морями" ռուսական ատլասի քարտէզում Բասեան ժողովուրդը տեղադրուած է Չերեկ գետի վերին հոսանքում՝ օւերի եւ լեչխումցիների հարեւանութեամբ: Այնուհետեւ այս էթնոնիմը յաճախ է յիշատակուում XIX դ. առաջին քառորդի ռուսական փաստաթղթերում, որոնց հեղինակներն օսական կամ վրացական ծագում ունեցող անձինք էին⁵⁶:

Ելնելով վերոյիշեալից՝ դժուար չէ

տեսնել Բասեան եւ Փասիան ցեղանունների նոյնութիւնը, առաւել եւս, որ Քսենոփոնի Հայաստանում յիշատակած փասիանների բնակութեան տարածքում հայկական աղբիւրներն արձանագրում են Բասեան գաւառի գոյութիւնը: Աւելին՝ անշուշտ առաջնութիւնը պէտք է տալ ոչ թէ Փասիան, այլ Բասեան հնչմանը, որը գրաւոր աղբիւրներում հանդէս է գալիս շատ աւելի ուշ ժամանակներում: Բնակաւարտը հարց է ծագում, թէ ինչո՞ւ յոյները պէտք է Բասեանը հնչէին Փասիան (Φασιανός), երբ ունէին «β» հնչիւնը: Կարծում եմ, որ բացատրութիւնը մէկն է: Մ. թ. ա. V դ. ցեղանունը դեռեւս չէր վերածուել Բասեան-ի եւ հնչում էր Վասեան, որը յոյները կարող էին տառադարձել կա՛մ որպէս Φασιαν, կա՛մ՝ Օύασιαν: Գերադասութիւնը տրուել է, այնուամենայնիւ, Φασιαν-ին: «վ»-ի հնչեղացումը եւ վերածումը «բ»-ի կատարուել է տիպիկ հնդեւրոպական օրինաչափութիւններով, որը յատուկ է ոչ միայն հայերէնին, այլեւ իրանական լեզուներին:

Պարզելով, որ փասիանները իրանական ցեղ էին⁵⁷ եւ դրանով իսկ կոլխերը՝ իրանական ցեղախումբ՝ կամայ թէ ակամայ ստիպուած ենք ընդունելու մոսքերի՝ որպէս կոլխական ցեղի իրանական լեզուաշխարհին պատկանելը, որը, կարծում ենք, իր հաստատումն է գտնում յոյն հեղինակների երկերում: Ստրաբոնի տեղեկութիւններից մէկի համաձայն, որը ծագելով Միհրդատեան պատերազմների պատմիչներից, անկասկած, մեծ հաւաստիութիւն ունի, Սեւ ծովի ափագծով բնակուող ցեղերն էին աքեյցիները, այնուհետեւ զիգերը, յետոյ հեմիոքները, կերկետները, մոսքերը եւ կոլքերը⁵⁸: Յիշեալ ցեղերի աշխարհագրական հերթականութիւնը կասկած չի թողնում, որ յիշատակութեան մոսքերը չեն նոյնանում տարածքային ա-

ռումով այսրկովկասեան խալիւ-մոսքերին, չնայած բոլոր հիմքերը կան կարծելու, որ նոյն ցեղի տարբեր հատուածներն են: Գելանիկոս Միտիլենացու տեղեկութիւններն էլ աւելի են յստակեցնում մոսքերի նշուած հատուածի տեղադրութիւնը: Ըստ նրա՝ կերկետներից վերեւ բնակուած են մոսքերը եւ քերիմատները, ներքեւ՝ հեմիոքները, իսկ աւելի վեր՝ կորաքսները⁵⁹: Կորաքսների տեղադրութիւնը որոշակի է հետեւաբար Գելանիկոսի նշած մոսքերը տեղադրուած են իրօք նրանցից հիւսիսարեւմուտք: Մոսքերին կերկետների հարեւանութեամբ տեղադրուած է նաեւ Պալեթատոսը⁶⁰: Պատմագիտութեան մէջ ընդունուած է կերկետներին նոյնացնել չերքեզների հետ, սակայն, անկախ այդ նոյնացումից, բերուած տեղեկութիւնները հաւաստում են նրանց չերքեզների տարածքում կամ մօտաւորապէս նոյն տարածքում գտնուելը: Ուստի պէտք է ենթադրել, որ ցեղերի ու ժողովուրդների մեծ շարժի ժամանակներում մոսքերի մի մասը հաստատուել է Հիւսիսային Կովկասի կողմերում, իսկ միւս հատուածը, շարժուելով հարաւ, հաստատուել է ներկայիս Վրացական հանրապետութեան հարաւ-արեւմտեան շրջանում: Մոսքերը, հետեւաբար, վրացական ցեղ չեն եղել, այլ միայն հետագայում, ինչպէս կարելի է եզրակացնել Ստրաբոնի տեղեկութիւններից, յայտնուել են Մեծ Հայքի, Վիրքի եւ Կողքի քաղաքական տիրապետութեան ներքոյ⁶¹ եւ աստիճանաբար լուծուել հայկական ու վրացական էթնոսների մէջ: Աւելին՝ ամենայն հաւանականութեամբ, սկզբում մոսքերը պէտք է գտնուէին որպէս անկախ քաղաքական միաւոր Վիրքի եւ Հայքի միջեւ, եւ վրացիներն իրենցից հարաւ գտնուող ժողովրդի անունը պէտք է տեղափոխէին հայերի վրայ, երբ վերջինները տիրացան մոս-

քերի երկրին Արտաշէս Ա-ի օրերում: Գոնէ մեր կարծիքով՝ վրացիների կողմից հայերին տրուած սոմէսի էթնանունը կարող էր ծագել մոսք կամ մոսիս անունից եւ ոչ թէ Սուխու երկրանունից, ինչպէս այսօր ընդունուած է պատմագիտութեան մէջ⁶²:

Հարց է ծագում, իսկ յիշեալ կոլխական մոսք ցեղախումբը աղերս ունի մուշքիոդիացիների հետ, թէ՞ ոչ: Վերջիններս Փոքր Ասիա ներխուժեցին եւ հաստատուեցին մ. թ. ա. XIII-XII դդ. եւ, եթէ մոսքերը բնակուել են տիրաբնեցիների հարեւանութեամբ, ապա նրանք կարծես թէ պէտք է նոյնանային մուշքերի հետ: Նման նոյնացման առաջին մերժումը պէտք է կապել նրանց էթնիկ պատկանելիութեան հետ, քանի որ մոսքերը կոլխական ցեղ էին կամ ժողովուրդ, իսկ մուշքերը մաս էին կազմում թրակա-փոլեզիական ընդհանրութեան: Փոլեզիացիները հաստատուած են Փոքր Ասիայի կենտրոնական շրջաններում՝ տարածուելով մինչեւ Հալիս գետը եւ, դատելով մի շարք տուեալներից, մասամբ անցնում են այն եւ բնակեցնում Կապադովկիայի արեւմտեան շրջանները: Այս առումով հետաքրքիր է Յովսէպոս Փլաւիոսի մի տեղեկութիւնը, ըստ որի՝ «եւ մեքսեանները, որոնք հաստատուել են Մեսքեսի կողմից եւ այժմ կոչուում են կապադովկիացիներ, սակայն նրանց հնագոյն անուանման ապացոյցը բացայայտ է, որովհետեւ նրանց մօտ կայ մի քաղաք, որ մինչեւ հիմա էլ կոչուում է Մազակա եւ հասկացողներին թելադրում է ենթադրելու, որ այսպէս է կոչուել ամբողջ ազգը»⁶³: Մեքսեաններին կապադովկիացիներին նոյնացնելու հանգամանքը ծանօթ էր նաեւ այլ հեղինակների: Այսպէս՝ Եւստաթէոս Անտիոքացի արքեպիսկոպոսը նշում է, որ Օսոքը (անշուշտ Մոսքը) մեքսեանների նախահայրն էր,

որոնք իր ժամանակներում կոչւում էին կապաղովկիացիներ, իսկ Թեոդորիտոս եպիսկոպոս Կիրացին հաւաստում է, որ Մոսորը կապաղովկիացիների նախահայրն էր⁶⁴:

Կարծում եմ, որ այս տեղեկութիւնները համահունչ են նաեւ հայոց Պատմահօր հաղորդումներին: Ըստ Մովսէս Խորենացու՝ հայոց Արամ (իմա՝ Արամանի) գահակալը դէպի Արեւմուտք կատարած արշաւանքի ժամանակ պարտութեան է մատնուել Պայապիս Քաաղեայ Տիտանեանին, որը թերեւս նոյնանուն է լիւդիական թագաւոր Արդիսի որդուն՝ Սադեատին⁶⁵, եւ գրաւեալ հողերում «իւր թողեալ զոմն Մշակ անուն յագգէ իւրմէ եւ բիւր մի ի զօրացն ի վերայ աշխարհին՝ եւ ինքն դառնայ ի Հայս:

Բայց հրաման տայ բնակչաց աշխարհին՝ ուսանել զխօսս եւ զլեզուս հայկական, վասն որոյ մինչեւ ցայսօր ժամանակի անուանեն Յոյնք զկղիմայն զայն Պոտոյն Արմենիան, որ թարգմանի Առաջին Հայք: Եւ զդաստակերտն, զոր շինեաց յանուն իւր Մշակ կողմնապետն Արամայ, փոքրագունիւք պարսպեալ որմովք, անուանէին հինք աշխարհին՝ Մածաք, որպէս ոչ կարելով ուղղախօսել. մինչեւ յետոյ յոմանց ընդարձակագոյն շինեալ՝ անուանեցաւ Կեսարիա»⁶⁶:

Ըստ իս՝ միանգամայն իրաւացի են Ս. Երեմեանը եւ այլ ուսումնասիրողներ, ովքեր Արամի կողմնապետ Մշակի անուան մէջ տեսնում են Փոհիգ-միւսիացիների Մուշք ցեղանունը՝ հին հայկական ձեւով⁶⁷, սակայն այնուամենայնիւ կան իրողութիւններ, որոնք անհրաժեշտ բացատրութեան կարիք ունեն: Դատելով այն հանգամանքից, որ Մուշքու-ի հիմքում ընկած է «մուշ»-ը, որից կարող էր ծագել նաեւ հայկական Մուշ քաղաքի անունը⁶⁸, կարելի է ենթադրել, որ մշակ նշա-

նակել է պարզապէս «մուշ» ցեղին պատկանող մարդ: Ինչ վերաբերում է «-քու» վերջաւորութեանը, ապա չի բացառւում, որ այն հայկական հոգնակիակերտ «-ք»-ն է, որը, հայերի միջոցով անցնելով ասորեստանցիներին եւ յարմարեցուելով ասորերէնին, ստացել է «-քու» տեսքը:

Հր. Աճառեանը, անդրադառնալով «մշակ» բառի ստուգաբանութեանը, նշել է, որ այն նշանակում է «հողագործ, երկրագործ, այգու աշխատակոր» եւ փոխառնուել է կովկասեան լեզուներից: Նա այն համեմատում է վրացերէն «մուշա» եւ «մուշակի» բառերի հետ, որ նշանակում է «գործաւոր», «մուշաորս» եւ «մուշակորս» բառերի հետ, որ թարգմանւում են «աշխատանք», «մուշորս»-ին, որ ունի «ստրկութիւն, գերութիւն» իմաստը, ինչպէս նաեւ լազ. *muša* (բռնակիր), ինգուչերէն՝ *mušaabay*, մենգր.՝ *vimušuat, mušeoba*, սուաներէն՝ *limšav, limšae* (աշխատիլ, աշխատանք) եւ այլ բառերի հետ: Հաշուելի առնելով այն հանգամանքը, որ յիշեալ բառը հանդիպում է ե՛ւ հիւսիսային, ե՛ւ հարաւային կովկասեան լեզուներում, ինչպէս նաեւ այն իրողութիւնը, որ հայերէնը կարող է բացատրուել «-ակ» մասնիկով, սակայն «մշ-» արմատը հայերէնում գոյութիւն չունի եւ գտնւում է մուշ, միշ, մշ ձեւերով կովկասեան զանազան լեզուների մէջ ու ունի առաւել ընդհանուր իմաստ, մինչդեռ հայերէնի մէջ «երկրագործ» նոյն գաղափարի մի մասնաւոր առումն է միայն՝ Հր. Աճառեանը գտնում է, որ բառը կովկասեաններից է անցել հայերէնին եւ ոչ թէ հակառակը⁶⁹: Առաջին հայեացքից, այս տեսակետը կասկածներ չի յարուցում, սակայն պարզւում է, որ մշակ բառի իմաստները հայերէնում իրականում աւելի շատ են: Գ. Սարգսեանը միանգամայն հիմնաւոր ցոյց է տուել, որ «մշակ» նշանակել է

ստրուկ կամ ստրկակամին մօտ սոցիալական խաւի ներկայացուցիչ, ինչը իր հաստատումն է գտնում վրացերէն մուշորս բառի մէջ⁷⁰: Ամէն ինչից դատելով՝ «մշակ»-ը սկզբնապէս արտասանուել է մուշակ, որը պահպանուել է անփոփոխ ձեւով վրացերէնում, իսկ հայերէնում «ու»-ի անկումը կատարուել է շեշտակորոյս լինելու հետեւանքով: Կեսարիայի տեղում հնում կառուցուած քաղաքը սկզբում կոչուել է Մուշակք, որը ու՛ա անցումից յետոյ վերածուելու էր Մաշակք-ի եւ յունարէնում ստանալու էր *Ι αζακα* արտասանութիւնը, որում -α-ն հայերէն «ք»-ին համարժէք յոգնակիակերտ մասնիկն է: «Կք»-ի արտասանութեան դժուարութիւնը յանգեցրել է «կ»-ի անկմանը, որի հետեւանքով Պատմահօր երկում քաղաքանունը պահպանուել է Մածաք գրութեամբ:

Արդ, կարո՞ղ էին արդեօք յիշեալ մուշքուները կամ մեքենները սահմանակից լինել տիրաբեկներին, ինչպէս այսօր ընդունուած է պատմագիտութեան մէջ: Կարծում եմ, որ սկզբնաղբերները նման տեղադրութիւնը չեն հաստատում: Թիւրիմացութիւնը գալիս է Հերոդոտոսի երկի տուեալները ճիշտ չ'ընկալելուց: Անդրադառնալով յոյն-պարսկական կոիւնների կապակցութեամբ պատերազմի մասնակիցներին՝ նա նշել է, թէ՛ «Մոսքերն իրենց գլխին ունէին փայտէ սաղաւարտներ. նրանք կրում էին վահաններ եւ երկար ծայրերով փոքր նիզակներ: Տիրաբեկները եւ մակրոները եւ մոսսիոնները արշաւում էին զինուած մոսքերի նման: Նրանց առաջնորդներն էին հետեւեալները. մոսքերի եւ տիրաբեկների՝ Արիոմարդոսը, Դարեհի եւ Պարմիսի, Կիւրոսի Սմերդիս որդու դստեր, որդին, մակրոների եւ մոսսիոնների՝ Քերասմիսի որդի Արտաիւկտեսը, որը հելլեսպոնտոսեան

Սեստոսի կառավարիչն էր»⁷¹: Մեզ անյայտ պատճառներով, պարսից արքունիքը յարմար է գտել տիրաբեկներին եւ մոսքերին պատերազմի դուրս բերել միասնական հրամանատարութեան ներքոյ, չնայած աշխարհագրականօրէն նրանք սահմանակից չէին: Յամենայն դէպս Հերոդոտոսը, յիշատակելով Հալիսի աւազանի ցեղերին, յիշատակում է միայն մատիեններին, փոհիացիներին, կապաղովկեան սիրիացիներին եւ պափլագոնացիներին⁷²: Քսենոփոնը տիրաբեկներին սահմանակից էր համարում մոսսիոնների ենթակայութեան տակ գտնուող խալիւքներին⁷³, իսկ նրան հետեւող Ստեփանոս Բիւզանդացին նշում էր, որ Տիրաբեկիան Պոնտոսի երկրներից է, որը յարում է խալիւքներին եւ մոսսիոններին⁷⁴: Քսենոփոնի համաձայն՝ Տիրաբեկների երկրին յաջորդել էր Պափլագոնիան⁷⁵: Հալիսի աւազանի Հերոդոտոսեան նկարագրութեան եւ Քսենոփոնի տուեալների համեմատութիւնը պարզում է, որ պափլագոնացիները տիրել էին լեւոսիոնների տարածքին եւ անմիջական հարեւանութեան մէջ յայտնուել տիրաբեկների հետ⁷⁶:

Ինչպէս դժուար էր համոզուել, տիրաբեկների անմիջական հարեւանութեամբ մոսքեր չեն եղել: Նրանք գտնուել են խալիւք-մարերի եւ սպիտակ ասորիների կամ լեւոսիոնների միջեւ: Մոսքերը, որ նոյնական են խալիւքներին, զբաղեցրել են ձորոխ գետից մինչեւ Կուր ընկած հողերը, որոնց հարաւային սահմանագիծն էլ պէտք է համապատասխանէր XIII եւ XIX սատրապութիւնների նշուած հատուածին: Ուստի բաց է մնում լոկ այն խնդիրը, թէ՛ մատիեններին պէտք է փնտրել մոսքերից հիւսիս, թէ՛ հարաւ: Հարցիս պատասխանը տալիս է Քսենոփոնը, ըստ որի Հայկական սատրապութեան արեւմտեան հատուածի հիւպարքոս Տիրի-

բազումի ենթակայութեան տակ էին փաստագրերը եւ հետազոտողները, իսկ ազդեցութեան տակ էին տառիքները, որոնք որպէս վարձկաններ ծառայում էին նրա բանակում⁷⁷: Ճիշտ է, հեղինակի հաւաստմամբ, Տիրիբազոսը վարձկաններ էր հաւաքագրել նաեւ խալիւքներից⁷⁸, սակայն դրանց տակ պէտք է հասկանալ, ըստ երեւոյթին, սկիւթներին, որոնք կառաւարում էին իրենց գրեթէ անկախ թագաւորի կողմից:

Ստացւում է մի հետաքրքիր պատկեր: Եթէ փաստագրերը գտնուում են տասներեքերորդ սատրապութեան մէջ, ապա ծիծաղելի է նրանցից հարաւ մատիններ փնտրելը: Աւելին՝ եթէ անգամ ընդունենք, որ մատինները, իրօք, բնակուել են հայկական Արաքս-Երասխի վերին հոսանքի շրջանում, որը սկզբնաղբիւրներով չի հաստատուում, ապա չպէտք է մոռանալ, որ Երասխի ակունքը հնում ոչ թէ Բիւրակնեան լեռներից կամ Սերմանցից սկիզբ առնող գետն էր, այլ Բասենի դաշտով հոսողը⁷⁹, հետեւաբար ստացւում է, որ փաստագրերի երկիրը նոյնանում է մատինների երկիրը, որը ոչ մի հիմք չունի: Փաստագրերի երկիրը տասներեքերորդ սատրապութեան մէջ գտնուելու դէպքում բացառում է նաեւ Սպերի երկրամասի տասնութերորդ սատրապութեանը պատկանելը, քանի որ նրանց երկիրը, որ Քսենոփոնին յայտնի է նաեւ Հեսպերիտիս անունով, նոյնպէս ենթակայ էր Տիրիբազոսին⁸⁰: Այս հանգամանքը ոչ միայն մերժում է սասպերներին Սպերի տարածքում տեսնելը, այլեւ մեզ իրաւունք է տալիս Մատիններ տեղադրելու Մոսքերից հիւսիս: Վերջիններիս զբաղեցրած տարածքը ճշգրտելուց առաջ փորձենք տեղադրել սասպերներին եւ ալարոներին:

Սասպերներ: Ինչպէս արդէն վերը նշեցինք, Պատմահայր Հերոդոտոսը սաս-

պերներին յիշատակում է տասնութերորդ սատրապութեան բնակիչների թւում: Մէկ այլ կապակցութեամբ նա նրանց յիշում է մեղացիների եւ կոլքերի հարեւանութեամբ⁸¹, իսկ անդրադառնալով Հարաւային կամ Կարմիր ծովից (իմա՝ Պարսից ծոց եւ Էրիտրեան կամ Արաբական ծով) մինչեւ Հիւսիսային կամ Սեւ ծովը թափուող Փասիս գետը բնակուող ժողովուրդներին, նա գրում է. «Նրանցից (պարսիկներից - Յ. Բ.) դէպի հիւսիս բնակուում են մեդացիները, մեդացիներից (վերեւ)՝ սասպերները, սասպերներից (վերեւ)՝ կոլքերը՝ տարածուելով մինչեւ Հիւսիսային ծովը, որտեղ թափուում է Փասիս գետը: Ահա այս չորս ազգերն են բնակուում մէկ ծովից միւսն (ընկած երկրում)»⁸²: Հերոդոտոսը սասպերներին անդրադառնում է եւս երկու անգամ: Նա նշում է, որ «Մեյոտիս լճից մինչեւ Փասիս գետը եւ կոլքերի երկիրը երեսուն օրուա ճանապարհ է անխոնջ ուղեւորի համար: Կոլքիսից Մեդիա անցնելու է ճանապարհը, բայց նրանց միջեւ բնակուում է մի ազգ սասպերները. սրանց միջով անցնելուց յետոյ կարելի է հասնել Մեդիա»⁸³: Դժուար է տեսնել, որ սա յար եւ հարազատ է նախորդ տեղեկութիւններին: Իսկ վերջին տեղեկութիւնը, որը հաւաստում է յոյն-պարսկական պատերազմի ժամանակ ալարոների եւ սասպերների կոլքերի նման գինուած լինելը եւ Սիրոմիտրեսի որդի Մասիստրոսին առաջնորդ ունենալը⁸⁴, անուղղակի վկայութիւն է երկուսի՝ տասնութերորդ սատրապութեան բնակչութեան մաս կազմելու: Յիշեալ տուեալները ցոյց են տալիս, որ սասպերները զբաղեցրել են ահռելի տարածք՝ կոլքերից մինչեւ մեդացիները նկատ հողերը, ուստի միամտութիւն է նրանց Սպերի փոքրիկ շրջանում տեղադրելը: Աւելին՝ ինչքան էլ փորձենք

Մեդիան տեսնել շատ անելի ձգուած դէպի արեւմուտք, այնուամենայնիւ ստիպուած ենք նրանց տեղորոշել կոլքերից արեւելք եւ մարերից արեւմուտք կամ հիւսիս-արեւմուտք: Այդ դէպքում ստիպուած ենք ընդունել, որ սասպերները պէտք է զբաղեցնէին առնուազն Արեւելեան Վրաստանի տարածքը, իսկ մար-մեդացիներին իրօք իրենց տարածքներում տեսնելու դէպքում՝ նաեւ հետագայ Աղուանքի կամ Կուրի ձախափնեակի շրջանը: Բնականաբար հարց է ծագում, թէ ինչպէս այդպիսի մեծ տարածք բնակեցրած ժողովուրդը կամ ցեղախումբը յանկարծ անհետանում է պատմութեան թատերաբեմից:

Հարցը պարզաբանելու համար դիմենք այլ վկայութիւնների քննութեանը: Ապոլլոնիոս Հոնդոսցու տուեալներով, որը մ. թ. ա. III դարի պատմագիր է, Արգոնաւորդների արշաւի հետ կապուած Փինէոսը նշում է, թէ վիզիրներից վերեւ ապրում են մակրոները, իսկ նրանցից այն կողմ բեխիրների բազմամարդ ցեղը եւ անմիջապէս նրանցից այն կողմ սասպերները եւ միայն նրանցից յետոյ ռազմաշունչ կոլքերը⁸⁵: Կարծում եմ, որ առանձնապէս մեծ տրամաբանութիւն չի պահանջուում եզրակացնելու, որ յիշատակութեան սասպերները նոյնական են սասպերներին եւ սահմանակից են կոլքերին: Ապոլլոնիոսը եւս մէկ անգամ մակրոների հարեւանութեամբ յիշում է բեխիրներին, այնուհետեւ հպարտ սասպերներին ու նրանցից այն կողմ բիզիրներին⁸⁶: Շատ հետաքրքիր է Ապոլլոնիոսի «Արգոնաւորդների արշաւը» սքոլիայի այն տեղեկութիւնը, թէ բեխիրները սկիւթական ժողովուրդ են եւ նրանցից յետոյ սասպերներն են, մի սկիւթական ժողովուրդ, որն իբր իր անունը ստացել է նրանց մօտ առատութեամբ հանդիպող «սասպերին» քարի

անուանումից⁸⁷: «Արգոնաւորդների արշաւը» գրքի հեղինակ Կեղծ-Օրփեոսը բիզիրների հարեւանութեամբ յիշատակում է սասպերների խիտ բնակեցուած քաղաքները⁸⁸, իսկ Ստեփանոս Բիւզանդացին նրանց համարում է Պոնտական տարածաշրջանի ժողովուրդ, որի անունը անելի ուշ արտասանուել է սաքիր⁸⁹:

Ընդհանրացնող հայեացք նետելով բերուած տեղեկութիւններին՝ ստիպուած ենք եզրակացնելու, որ սասպերները սկիւթական ժողովուրդ են կամ ցեղախումբ, որը պէտք է եւ զինուած էր մէկ այլ սկիւթական ցեղախումբի՝ կոլքերի նմանութեամբ: Սասպերները սահմանակից են մար-մեդացիներին, հետեւաբար նրանք զբաղեցրել են Կովկասեան լեռներից հարաւ ընկած հողերը՝ ներառեալ Արեւելեան Վրաստանի կամ Վիրքի տարածքը եւ Աղուանքը կամ Կուրի ձախափնեակը: Չի բացառուում, որ նրանք մասամբ հաստատուած են եղել նաեւ Կուրի աջափնեակում, սակայն, դատելով վարչական միաւորներ ստեղծելու օրինաչափութիւններից, նրանց հարաւային սահմանագիծը պարսիկները համարել են Կուր գետը:

Սասպերների անունը, որ Ապոլլոնիոսի «Արգոնաւորդների արշաւ»-ի սքոլիայի հեղինակը կապում էր «սասպերին» քարի անուանման հետ, ըստ երեւոյթին, պատահական նմանութեան արդիւնք է: Կարծում եմ, որ անունս ծագում է սկիւթա-այլանական աշխարհին պատկանող աս ցեղախումբի անուանումից, որի մի մասը մեզ անյայտ պատճառներով կրել է սասպեր անունը⁹⁰: Սասպերների մի մասը հաստատուում է Մեծ Հայքի Սպեր գաւառում, իսկ աս ցեղի մի հատուածը՝ Ասեաց փոքր կամ Արսեաց փոքր գաւառում⁹¹: Շատ հետաքրքիր է այն փաստը, որ Պլինիոս Աւագը Ասեաց փոքր գաւառի տարածքում, գուցէ եւ շրջակայքում յի-

շատակում է Sacasani ցեղը, որի անունը, ըստ իս, պէտք է բացատրուի որպէս աս սակեր կամ սկիւթներ⁹²: Ինչ վերաբերում է Սպերին, ապա այն պահպանել է ասպէր ցեղանունը: Հասկանալի է, որ ասպէրներ էին նաեւ սասպէրները, որոնք Հերոդոտեան ժամանակներում հեռացել էին իրենց սպերեան ազգակիցներից եւ բռնել աստիճանական վրացականացման ուղին: Սասպէր անուանման հանդէս գալը հէնց այդ երեւոյթի արտայայտութիւնն էր, երբ արդէն վրացերէնին յատուկ սկզբունքով ասպերներէ հաւաքականութիւնը ստանում էր սասպէր կամ սասպէր տեսքը: Ի. Մ. Դեակոնովը գտնում է, որ ասպէրները որոշակիորէն նոյնանում են արեւելեան վրացիներին, սասպէրներին համարում է վրացական ցեղ⁹³, սակայն սասպէրները սկիւթներ են, որոնք պէտք է տարալուծուէին Արեւելեան Վրաստանի քարտական բնակչութեան մէջ: Վրացիներին հարեւանների կողմից տրուած իբեր, իվեր եւ վրացի էթնանունները, ինչպէս նաեւ Քարթլիի Իվերիա եւ Վիրք անունները ծագում են ասպէր ցեղանունից, սակայն ոչ թէ շորոխի աւազանում հաստատուած ասպէրական ցեղերն են եղել դրա կրողները⁹⁴, այլ Վիրքի տարածքում բնակութիւն հաստատածները: Արդէն այն հանգամանքը, որ ասպէր անունը Սպերում գործնականում փոփոխութիւն չի կրում, հաւաստում է, որ նշուած գործընթացները ընթացել են Արեւելեան Վրաստանի կամ Վիրքի տարածքում: Ինչպէս վրացիների համար հայերը սոմէսի էին մոսքերի հետ կապուած, այնպէս էլ հայերի համար վրացիները իբեր-իվեր-վիր էին, քանի որ սասպէրական ցեղերը բնակուում էին նրանց սահմանակցութեամբ:

Հասկանալի է, որ արեւմտեան հեղինակները յիշեալ ցեղախումբը սասպէրներ

էին կոչում նրանց արեւմտեան հատուածի անունով, որովհետեւ տարածաշրջանի էթնիկ պատմութիւնը չի հաւաստում վրացական տարրի այդօրինակ տարածումը: Սասպէր անունը հաւաքական անուանում էր եւ այդ ցեղախմբի մէջ բազմաթիւ ցեղեր եւ անգամ ցեղային փոքր խմբեր էին գտնուում: Ամէն ինչից դատելով՝ դրանց թւում էին մատիեմները եւ ալարոդները:

Ալարոդներ: Ի տարբերութիւն սասպէրների, ալարոդները յիշատակում են ընդամենը երկու անգամ եւ այն էլ միայն Հերոդոտոսի կողմից: Նորից մէջբերել դրանք, անդրադառնալով այդ տեղեկութիւններին, որոնք արդէն մէջ են բերուել, իմաստ չունի: Լոկ նշենք, որ նրանք սասպէրների եւ մատիեմների հետ բնակուում էին տասնութերորդ սատրապութեան մէջ եւ յոյն-պարսկական պատերազմների ժամանակ զինուած էին, ինչպէս եւ սասպէրները կողքերի նմանութեամբ: Թերեւս, դժուար է գտնել պատմագիտական որեւէ մի երկ, որտեղ ալարոդները չնոյնացուեն ուրարտացիների հետ, սակայն այդ նոյնացումը ոչ տրամաբանական է եւ ոչ էլ հիմնաւորուած: Ալարոդների մասին, թէկուզեւ կցկտուր, տեղեկութիւններից կարելի է միայն ու միայն ենթադրել, որ նրանք եւս պատկանում էին սկիւթական աշխարհին: Դեռ որեւէ մէկը փորձ չի արել ուրարտացիներին վերագրելու իրանական ծագում, որով եւ ուրարտացի-ալարոդ նոյնացումը բացառուում է, սակայն ալարոդները չեն կարող նաեւ վրացական ակունքներ ունենալ. քանի որ բառի մէջ երկու «ր» լիներ ուղեւորում «լ»-ի է վերածուում ոչ թէ առաջինը, այլ՝ երկրորդը: Ալարոդների ղէպը մենք տեսնում ենք դրա հակառակ պատկերը:

Աքեմենեան Պարսկաստանի հիւսիսա-

յին սահմանը, Հերոդոտոսի հաւաստմամբ, անցնում էր Կովկասեան լեռնաշղթայով. «Նոյնիսկ կողքերը եւ հարեւանները՝ մինչեւ Կովկաս լեռը (լեռնաշղթան - Յ. Բ.), քանզի մինչեւ այդ լեռը տիրում են պարսիկները, իսկ Կովկասից հիւսիս (ընկած երկիրը) հաշուի չի առնում պարսիկներին, նոյնպէս հարկ տալիս են ընծաներ մատուցելու ձեռով»⁹⁵: Ստացում է հետաքրքիր կացութիւն: Մի կողմից՝ կարծես թէ կասկած չկայ, որ Աքեմենեան Պարսկաստանի սահմանը հասել է մինչեւ Մեծ Կովկասի լեռնաշղթան, իսկ միւս կողմից՝ զարմանալիորէն Կուրից հիւսիս ընկած երկիրը, թւում է, չի մտնում ոչ մի սատրապութեան մէջ: Անշուշտ, կարելի է ենթադրել, որ Պարսից տէրութեան սահմանն անցել է Կուր գետով, որը բաւականաչափ ամուր պատնէշ էր հիւսիսային կովկասեան քոչուորների դիմաց, սակայն, այնուամենայնիւ, այն անհամեմատ աւելի խոցելի պատուար էր, քան Կովկասեան լեռնաշղթան, ուստի միանգամայն տրամաբանական պէտք է համարել այն միտքը, որ Աքեմենեան տէրութիւնն իր սահմանները հասցրել է մինչեւ Կովկասի լեռները: Այդ ղէպը պէտք է պատասխան տալ այն հարցին, թէ ովքե՞ր են բնակեցրել Կովկասեան լեռնաշղթայի եւ Կուրի միջեւ ընկած տարածքը:

Այս հարցին անդրադառնալուց առաջ քննարկենք մի շատ կարեւոր հարց՝ կապուած տասնմէկերորդ եւ տասնհինգերորդ սատրապութիւնների տեղադրութեան հետ, որը լոյս է սփռում, իրօք, նշուած կնճռոտ հարցերի վրա: Առաջինի մասին Հերոդոտոսը գրում է. «Կասպերը, պաւսիպները, պանտիմոսները եւ դարեյտները մէկ նահանգ կազմած վճարում էին երկու հարիւր տաղանդ: Սա էլ տասնմէկերորդ նահանգն էր»⁹⁶: Իսկ երկրորդն

ունի հետեւեալ նկարագրութիւնը. «Սակերը եւ կասպերը վճարում էին երկու հարիւր յիսուն տաղանդ. սա տասնհինգերորդ նահանգն էր»⁹⁷: Հարկ է նշել, որ սրանց տեղադրութեան մասին միասնական կարծիք գոյութիւն չունի: Մասնաւորապէս՝ որոշ հետազոտողներ փորձում են տասնհինգերորդ սատրապութիւնը տեղորոշել Այսրկովկասում՝ փորձելով սակերիմ տեղադրել Սակասենէի տարածքում, այսինքն՝ Գանձակ, ներկայիս Գեանջա քաղաքի շրջակայքում⁹⁸: Սակայն պատմաբանների մեծ մասը իրաւացիորէն ընդունում է, որ տեղեկութիւնը վերաբերում է միջինասիական սակերիմ, որոնք նոյնանում են բեհիթութեան արձանագրութեան Saka երկրին⁹⁹: Հասկանալի է, որ նման բացատրութեան ղէպը տասնհինգերորդ սատրապութիւնը կը յայտնուի Կասպից ծովից արեւելք ընկած հատուածում:

Թերեւս կարիք չկայ ընդգծելու, որ տասնմէկերորդ սատրապութեան կասպերը չեն նոյնանում տասնհինգերորդ սատրապութեան կասպերին: Եւ եթէ նրանք յիշատակում են տարբեր սատրապութիւններում, ապա այդ իրողութիւնը պէտք է բացատրել նրանց երկու հատուածների բնակութեան իրար չսահմանակցող տարածքների առկայութեամբ եւ, իհարկէ, նշանակալից բազմամարդութեամբ, որի շնորհիւ տեղ են գտնել երկու սատրապութիւնների նկարագրութեան մէջ: Չխորանալով հարցիս մանրամասներին մէջ՝ նշենք, որ ուսումնասիրողներն, ըստ մեծի մասին (Շթայն Լ., Հերման Ա., Դեակոնով Ի. Մ., "История Дагестана" գրքի հեղինակները, Կուզմինա Ե. Ե., Հերցֆելդ Ե. եւ ուրիշներ), տեղադրել են կասպերին Ատրպատականեան Մարաստանից հիւսիս-արեւելք, Կասպից ծովի հարաւ-արեւմտեան ափերին, Ապշերոնի թերակղզուց

դէպի հարաւ¹⁰⁰: Ըստ որում, այս կարծիքն առաջին հայեացքից անթերի է, որովհետեւ Ստրաբոնը, Կղաւզիոս Պտղոմէոսը եւ մի շարք այլ հեղինակներ Կասպից ծովի յիշեալ հատուածում, իրօք, տեղադրում են կասպերին: Ասենք, որ դրան չեն հակասում նաեւ հայկական աղբիւրների տեղեկութիւնները, որոնք նոյնպէս կասպերին տեղորոշում են Մեծ Հայքի եւ Աղուանքի Կասպից ծովին առափնեայ երկրամասերում: Այս տեղեկութիւններին մենք, անշուշտ, դեռ կանգրադառնանք, որովհետեւ դրանք լուրջ վերլուծութիւն են պահանջում, այժմ լոկ արձանագրենք, որ Կասպից ծովի հարաւ-արեւմտեան ափագծին վերոյիշեալ հեղինակները տեղադրում են տասնմէկերորդ սատրապութեան կասպերին:

Տասնհինգերորդ սատրապութեան կասպերը, ուսումնասիրողների մի մասի տեսակէտով, բնակեցրել են Հինդուքուշից հարաւ (Քաֆիրիստան-Նուրիստան եւ Զիթրալ) ընկած շրջանը¹⁰¹: Ու. Հաուն եւ Զ. Ուելսը հակուած են նրանց տեսնելու Քաշմիրում¹⁰², չնայած վստահ չեն տեղադրութեան խնդրում: Ի. Մ. Դեակոնովը, ելնելով այն հանգամանքից, որ Քսերքսեսի բանակում կռուող կասպերի հագուստը եւ զէնքը նման էին մ. թ. ա. I հազարամեակի մաննացիների եւ մարերի հանդերձանքին եւ զէնք ու զրահին, նրանց համարում է այսրկովկասեան ցեղ¹⁰³: Ինչ վերաբերում է տասնհինգերորդ սատրապութեան կասպերին, ապա Ի. Մ. Դեակոնովը նրանց տեսնում է Կասպից ծովից արեւելք՝ մերձկասպեան սակերի հարեւանութեամբ¹⁰⁴: Սակայն հեղինակը չի բացառում նաեւ տասնհինգերորդ սատրապութեան կասպերի տեղորոշումը Այսրկովկասում: Ստրուվէն յիշեալ սատրապութիւնը փորձում է տեղորոշել Արալի ծովից արեւելք՝ զիտարկելով վերջինս

որպէս Կասպից ծովի շարունակութիւն¹⁰⁵: Նա գտնում էր, որ կասպերը նոյնանում են սակերին, որոնք բնակուում էին Սոգդից այն կողմ եւ Դարեհ Ա-ի օրոք կազմել էին ծովից այն կողմ գտնուող Սակերի յատուկ շրջանը: Ըստ հեղինակի՝ յոյն հեղինակները Արալեան ծովից արեւելք բնակուող սակերին կոչում էին մասագետներ եւ դահեր, որոնցից ծովափնեայ շրջանում գտնուողները կոչուել են կասպեր¹⁰⁶:

Ինչպէս տեսնում ենք, կարծիքների եւ տեսակէտների պակաս չի զգացուում, սակայն հարցը մնում է մութ եւ անհասկանալի: Մի դէպքում, փաստօրէն, երկու կասպերն էլ յայտնուում են Այսրկովկասում, միւս դէպքում՝ Միջին Ասիայի կողմերում: Վերջապէս, շատ էական է մնում այն հանգամանքը, որ Մարաստանի անմիջական սահմանակցութիւնը սասպերներին, իրողութիւն, որ հաւաստում է Հերոդոտոսը, դառնում է ոչ միայն կասկածելի, այլեւ անհնարին: Ելնելով նշուած հակասական տեսակէտների առկայութիւնից, որոնք, ըստ իս, լոկ խճճում են խնդիրը՝ կամենում եմ ընթերցողի ուշադրութիւնը հրաւիրել Ու. Հաունի եւ Զ. Ուելսի այն ենթադրութեան վրայ, որ սատրապութիւնների ցուցակում կասպիացիների մարզը փոխարինում է Հիւրկանիային կամ Վրկանին¹⁰⁷: Հարկ է նշել, որ այս իրողութիւնը շարժել է մի շարք հետազոտողների զարմանքը¹⁰⁸:

Հերոդոտոսի «Պատմութիւնն», անշուշտ, տեղեակ է վրկանների գոյութեանը: Վերջիններս յիշուում են երկու անգամ: Ըստ Պատմահօր՝ «Ասիայում կայ մի դաշտավայր՝ բոլոր կողմերից լեռներով շրջափակուած, իսկ այդ լեռներով անցնում են հինգ նեղ կիրճեր: Այս դաշտավայրը հնում պատկանել է քորասմներին եւ գտնուում է նոյն քորասմների,

հիրկանների, պարթեւների, սարանգների եւ թամանների սահմաններում: Պարսից իշխանութեան հաստատումից յետոյ այն արդէն պատկանում է (պարսից) արքային: Արդ, դաշտավայրը շրջափակող լեռից հոսում է մի մեծ գետ, որի անունն է Ակէս: Այս գետը, բաժանուած լինելով հինգ թելի, հնում իւրաքանիւր թելով ուղղում էր վերոյիշեալ ժողովուրդներից իւրաքանչիւրի երկիրը, քանի որ ամէն մի կիրճից մի թել էր հոսում»¹⁰⁹: Հերոդոտոսի յաջորդ հաղորդմամբ «Հիւրկանները եւս զինուած էին պարսիկների նման. նրանց առաջնորդն էր Մեգապանոսը, որը հետագայում դարձաւ Բաբելոնի կառավարիչ»¹¹⁰: Յոյն-պարսկական կռիւների առնչութեամբ յոյն պատմագէտը յիշատակում է նաեւ կասպերին, որոնք «արշաւել էին այժեհի հագած, եւ իրենց տեղական եղէգնեայ աղեղներով ու ալիւնակներով զինուած: Նրանց հանդերձանքը այսպիսին էր. իսկ նրանց առաջնորդն էր Արտիսիքոսի եղբայր Արիմարդոսը»¹¹¹:

Հասկանալի է, որ կասպերի եւ վրկանների միաժամանակ յիշատակութիւնը պատմիչի կողմից կասկածի տակ է առնում Կասպերի երկրի եւ Վրկանի նոյնացման հնարաւորութիւնը, սակայն Վրկանից աշխարհի անուան բացակայութիւնը սատրապութիւնների ցուցակում նոյնքան տարօրինակ է, որովհետեւ տարածական առումով պէտք է ենթադրել, որ դատարկութիւն է առաջանում, կամ էլ այն վարչականօրէն ներառնուած է մէկ այլ երկրի մէջ: Այս առումով հետաքրքրութիւն են ներկայացնում Բեհիսթունեան ժայռի՝ Դարեհ Ա-ի թողած եռալեզուեան արձանագրութեան տուեալները: Պարսից թագաւորը յայտնում է, որ իրեն հպատակ են եղել 23 երկրներ, որոնց կազմում են Պարթեւքը, Սոգդը,

Բակտրիան, Խորեզմը, Սագաստանը եւ այլք, սակայն չի յիշատակում Վրկանը¹¹²: Այսուհանդերձ, Դարեհ Ա արքան նոյն արձանագրութեան մէջ մէկ այլ կապակցութեամբ գրում է, որ «Պարթեւն ու Վարկանան իմ դէմ ապստամբեցին եւ յարեցին Յրավարտիշին»¹¹³: Ի՞նչ է ստացուում: Մի կողմից՝ երկրանունը բաց է թողնուած ապստամբ երկրների ցուցակում, իսկ միւս կողմից՝ Վարկանան (=Վրկան) ապստամբ երկիր է: Որո՞նք են հնարաւոր եզրակացութիւնները: Թերեւս, Վրկանը, պարզապէս թիւրիմացաբար տեղ չի գտել հպատակ երկրների ցուցակում կամ էլ այն վարչականօրէն միացուած է եղել հարեւան երկրներից որեւէ մէկին: Առաւելութիւն տալ դրանցից որեւէ մէկին, դժուար է, սակայն այն հանգամանքը, որ Դարեհը հպատակ երկրների թիւը յատուկ սահմանում է 23, ապա, կարծես թէ գերադասելի է երկրորդ եզրակացութիւնը: Շատ հաւանական է, որ Պարթեւքն ու Վարկանան, յարելով Յրավարտիշին եւ ապստամբելով աքեմէնեան գահակալի դէմ, պարտութիւն են կրել ու յանձնուել մի կուսակալի կառավարմանը, որով էլ պայմանաւորուում է Վարկանավրկանի բացակայութիւնը հպատակ երկրների ցուցակում:

Հարկ է պատասխան տալ նաեւ մէկ հարցի եւս: Բիհիսթունեան արձանագրութեան հպատակ երկրների ցուցակը արտայայտում է սատրապութիւնների ստեղծմանը նախորդող վարչա-քաղաքական բաժանման կացութիւնը, թէ՞ վարչական բարեփոխումներին յաջորդած կացութիւնը: Ըստ իս՝ անտարակոյս է, որ արձանագրութեան հպատակ երկրների ցուցակը լոկ արտայայտում է ապստամբութեան պարտութեան անմիջապէս յաջորդող ժամանակաշրջանը, որովհետեւ հազիւ թէ այն գրուէր վարչա-քաղաքա-

կան մեծ վերափոխութիւնների կենսագործումից յետոյ: Հետեւաբար, շատ էլ չպէտք է կառչել արձանագրութեան հպատակ երկրների եւ հերոգոտեան սատրապութիւնների ցուցակների տարբերութիւններին: Առաջինը դեռեւս իր վրայ չի կրում վարչա-քաղաքական բաժանումներ իրականացնելու պետական նպատակասլացութիւնը, ինչ չի կարելի ասել, ինչպէս վերը տեսանք, երկրորդի մասին:

Պարզելով, որ վարչական բարեփոխումների հետեւանքով հնարաւոր էին երկրների եւ երկրամասերի ենթակայութեան փոփոխութիւնները՝ կարծում ենք, որ Ու. Հաուի եւ Ջ. Ուելսի ենթադրութիւնն ունի մեծ հաւանականութիւն, առաւել եւս, որ հերոգոտեան ցուցակում բացակայում է Վրկանից աշխարհի անունը: Տասնմէկերորդ սատրապութեան կազմում յիշատակուած ցեղերից առաւել յըստակ տեղադրուած են դարեյտները: Պտղոմէոսի «աշխարհագրութիւնը» նրանց տեղադրում է Կասպից ծովից հարաւ, ներկայիս Ռեյ քաղաքի մերձակայքում (պատմական Ռագայի): Ըստ հեղինակի՝ «Չազրոս լեռից դէպի արեւելք սագարտիացիներն են, սրանցից յետոյ՝ Հասնելով մինչեւ Պարթիա, Քորոմիթրենէ, որից դէպի հիւսիս էլիւմախսն է. նրանից դէպի արեւելք բնակուած են տապուրները: Քորոմիթրենէից դէպի հարաւ սիդիկներն են եւ Սիգրիանիկէն եւ Ռագիանէն. նրանց մօտ՝ Յասոնիոն լեռան ստորոտում վադասներն են եւ Դարեյտիս գաւառը եւ ամբողջ Պարսքի երկայնքով՝ Սիրոմիդիան»¹¹⁴: Այս նկարագրութիւնից դժուար է հետեւեցնել, որ Ռագիանէն Ռագա կամ Ռեյ քաղաքի շրջակայքն է, հետեւաբար Յասոնիոն լեռը ոչ այլ ինչ է, բայց եթէ Դամաստոս լեռը, որը գտնուած է Իրանի մայրաքաղաք Թեհրանից շուրջ 120 կմ հիւսիս-արեւելք: Հաղորդման համաձայն՝

վադասներին եւ դարեյտներին պէտք է տեղադրել Յասոնիոն կամ Դամաստոս լեռան հարեւանութեամբ: Հարցիս քննութեան առումով անգամ կարելի էլ չէ, թէ վերջինները տարածուած էին լեռից հիւսիս, հարաւ, թէ՞ արեւելք: Սակայն որոշակի է մի իրողութիւն: Եթէ Հերոգոտոսի սատրապութիւնների ցանկում տասնմէկերորդ սատրապութեան նկարագրութիւնը տրուած է հիւսիս-արեւմուտքից հարաւ-արեւելք ուղղութեամբ, ապա կասպերը նոյնական են յունա-հռոմէական աղբիւրների եւ հայ պատմիչների յիշատակած Կասպից ծովի հարաւ-արեւմտեան ափի կասպերին, սակայն արեւելքից արեւմուտք ուղղուածութեան դէպքում, կասպից վեր է, որ սատրապութեան կասպերը նոյնական են վրկաններին: Արդ, որի՞ն տալ գերադասութիւնը: Ըստ իս՝ սկզբնաղբիւրները խօսում են յօգուտ երկրորդի, որովհետեւ, երբ քննութեան ենք առնում Կասպից ծովի առափնեայ շրջանում ապրող ցեղերի տեղորոշման խնդիրը, ապա, համաձայն Ստրաբոնի, վրկանների եւ արիանների միջեւ բնակուել են տապիրները կամ տապուրները, իսկ վրկաններից այն կողմ ամարդները, անարիանները, կարդուսները (կատիշները), ադուանները, կասպերը, ուիտիները եւ այլ ժողովուրդներ մինչեւ սկիւթները¹¹⁵: Յոյն աշխարհագրագէտի միւս հաղորդմամբ՝ Կասպից ծովի արեւելեան ափին բնակուող դահերին կամ ապարներին Վրկանից աշխարհից բաժանում է անապատը եւ Կասպից ծովը շրջապատող լեռների լանջերին բնակուած է ադուանների եւ հայերի մի մասը՝ զբաղեցնելով մի ոչ մեծ հատուած, իսկ մնացած մեծագոյն մասը բնակատեղի էր ծառայում գելերի, կարդուսների (կատիշների), ամարդների, ուիտիների եւ անարիանների համար¹¹⁶: Ելնելով այն իրողութիւնից, որ տասնմէկսատրապութեան

մէջ յիշատակութիւն չկայ ամարդների եւ կատիշների մասին, որոնք կարող էին եւ բացակայել Մեդիայի սատրապութեան նկարագրութեան մէջ, սակայն հազիւ թէ չյիշատակուէին պաւսիկների եւ պանտիմարների անյայտ ցեղերի արձանագրուելու դէպքում՝ կարծում եմ, պիտի հիմնաւորուած համարել վերը առաջ քաշուած Կասպ-Վրկան նոյնացումը:

Հասկանալի է, որ այս դէպքում էլ բացատրութիւն է պահանջում Կասպից ծովի հարաւ-արեւմտեան ափին բնակուող կասպերի խնդիրը, որոնք, Ստրաբոնի վկայութեամբ, I դարում կորցրել էին իրենց ինքնութիւնը՝ հաղորդելով տեղանքին լոկ իրենց անունը: Կասպերը կարող էին յայտնուել Կասպից ծովի հարաւ-արեւմտեան ափերին կա՛մ հիւսիսային Կովկասից, կա՛մ էլ Միջին Ասիայից: Կասպերն, անշուշտ, պատկանել են Ադուանից թագաւորութիւնը բնակեցնող ցեղերի թուին: Սակայն կասպերի տեղադրութեան եւ Այսրկովկասում հաստատուելու հետ կապուած սկզբնաղբիւրների տեղեկութիւնների որոշ հակասականութիւնը պահանջում է բացատրութիւններ: Ստրաբոնի՝ Կասպից ծովին առափնեայ ցեղերի նկարագրութեան մէջ ասուած է, որ ծովի շրջագծով վրկաններից յետոյ բնակուած են ամարդները, անարիանները, կարդուսները (կատիշները - Յ. Բ.), այրանները, կասպերը, ուիտիները եւ, հաւանաբար, մինչեւ սկիւթները այլ ժողովուրդներ¹¹⁷: Էրատոսթենէսի համաձայն՝ «տեղաբնիկները Կովկասը անուանում են Կասպի (Κασπιον), հաւանաբար վերակոչելով կասպերի անունով»¹¹⁸: Ա. Յակոբեանն իրաւացիորէն նշում է, որ, բերուած տեղեկութիւնների համաձայն, կասպերը տեղադրուած են այրաններից հիւսիս, Կովկասեան լեռների եւ Կասպից ծովի միջեւ¹¹⁹: Դրան համահունչ են Պոմպո-

նիոս Մելայի եւ Դիոնիսիոս Ալեքսանդրացու տեղեկութիւնները, որոնցից առաջինի համաձայն՝ Կասպից ծովը Հիւսիսային ովկիանոսին միացնող նեղուցի¹²⁰ ափերին բնակուած էին քոչուոր սկիւթները, իսկ այնուհետեւ Կասպից ծոցի մօտ կասպերը եւ ամազոնոհիները, ... Վրկանից ծոցի մօտ ապրում էին ադուանները, մոսխերը, վրկանները¹²¹: Մէկ այլ կասպիցութեամբ, Պոմպոնիոս Մելան գրում է, որ Կովկասեան լեռները կոչուած էին Տարեան, Մոքական, Ամազոնեան, Կասպիական, Կորաքսեան եւ Կովկասեան՝ կասպերուած նրանց մերձակայքում ապրող ժողովուրդների անուանումների հետ¹²²: Ինչ վերաբերում է Դիոնիսիոս Ալեքսանդրացուն, ապա նա տալիս է մերձծովեան ժողովուրդների ներքոյիշեալ նկարագրութիւնը. «Ես կպատմեմ ամէնը այն մասին, թէ ինչ ցեղեր են ապրում նրա (Կասպից ծովի - Յ. Բ.) շուրջը, սկսելով հիւսիս-արեւմտեան կողմից: Առաջինը սկիւթներն են, որոնք բնակեցնում են Կրոնիան ծովին (Հիւսիսային ովկիանոսին - Յ. Բ.) մերձակայ ափը Կասպից ծովի բերանով. այնուհետեւ ունենալով (Οἰωνοί), իսկ նրանցից այն կողմ կասպերը, սրանցից յետոյ ռագմաշուէն կարդուսները (կատիշները) եւ ադուանները, որոնք բնակուած են լեռնային երկրում. նրանց մերձակայքում են մարդերը, վրկանները եւ տապիրները»¹²³: Հետագայ հեղինակներին անդրադառնալը իմաստ չունի, որովհետեւ նրանք միայն կրկնում են վերը բերուած տեղեկութիւնները:

Արդ, ինչ եզրակացութիւնների կարելի է յանգել: Դեռեւս 80-ական թթ. երկտասարդ ուսումնասիրող Ա. Յակոբեանը ցոյց է տուել, որ վերը բերուած տեղեկութիւնների կասպերը չեն նոյնանում Ստրաբոնի կողմից Փայտակարան աշխարհի կամ Կասպի կասպերին: Նա

գտնում է, որ վերը բերուած հաղորդումները կասկածի առարկայի արժանանալու և տեղադրելու Կասպից ծովի ափին, սակայն այլապես հիշատակում: Մեր կողմից կամենում ենք աւելացնել, որ որքան էլ Ստրաբոնի նշուած եւ Պոնապոնոս Մելայի ու Դիոնիսիոս Ալեքսանդրացու տեղեկութիւնները համեմատելի են, այնուամենայնիւ կան ուղղութեան արժանի տարբերութիւններ: Այսպէս՝ Ստրաբոնի մօտ կասկածը յիշուած են այլապէս հիշուած հիշուած, որոնցից էլ աւելի հիշուած տեղադրում են ուիտիները, Պոնապոնոս Մելայի սկիզբներից յետոյ թուարկում է հիշուած հարաւ ուղղութեամբ կասկածի եւ ամագոնոմիաներին, այնուհետեւ այլապէս, մոսքէրին եւ վրկաններին, իսկ Դիոնիսիոս Ալեքսանդրացին՝ Վոլգայի գետաբերանից սկսելով, յիշատակում է սկիզբներին, ունենալով, կասկածի եւ այնուհետեւ կադուսիներին, այլապէս, մարդերին, վրկաններին եւ տապիրներին: Համեմատութիւնից կարելի է անգամ եզրակացնել, որ ուիտիների մէկ այլ անունն էր ամագոնոմիներ, կասկած, հաւանաբար, մայրիշխանական տոհմական համայնքի գոյութեան հետ: Οἰνοί-ը անվերապահօրէն Οὔτοι-ի գրգռական աղաւաղումն է¹²⁴, հետեւաբար այն հոնների հետ նոյնացնելու փորձերը բնաւ էլ արդարացուած չեն¹²⁵: Անհատաւորէն կադուսիները յայտնուել են այլապէս հիշուած, որը հակասում է միւս հեղինակների տուեալներին եւ, ամենայն որոշակիութեամբ, ճիշտ չէ: Բերուած տեղեկութիւնների համաձայն՝ կասկածը յայտնուած են Հիւսիսային Կովկասում, բայց միաժամանակ նրանք Ստրաբոնի օրերում ապրում էին Կասպի-Փայտակարանի եւ Աղուանից Կասպի շրջանում: Հետեւաբար պէտք է եզրակացնել, որ տեղեկութիւնների նշանակալից մասը ծագում է շատ աւելի հին ժամանակներից՝ կա-

պուած, թերեւ, Պատրոկլէսի արշաւի հետ, եւ որ տեղի է ունեցել կասկածի գաղթ Հիւսիսային Կովկասից Այսրկովկաս: Անշուշտ, տեսականօրէն կարելի է ենթադրել, որ կասկածը կարող էին տեղափոխուել Այսրկովկաս Միջին Ասիայի եւ հիւսիս-արեւելեան Իրանի տարածքներից, սակայն այդ պէտք է բացառել՝ ոչ միայն ելնելով վերը բերուած տուեալներից, այլեւ մէկ այլ ոչ պակաս կարեւոր իրողութիւնից:

Յայտնի է, որ Իբերիան կամ Վիրքը անուանուել է նաեւ վարջան¹²⁶, որի նախնական ձեւն, անկասկած, լինելու էր վարջան կամ վարկան: «Աշխարհացոյց»-ը Քուստի - Խորասանի կամ Արեւելեան Քուստի մէջ յիշատակում է վարկան երկիրը կամ աշխարհը¹²⁷, որը նոյնանում է յունա-հռոմէական աղբիւրների Հիւրկանիային եւ հայկական սկզբնաղբիւրների վրկանից աշխարհին: Կարելի է, անշուշտ, ենթադրել, թէ նմանութիւնը պատահական է, ինչպէս, օրինակ, Պիրենեյան թերակղզու Իբերիան եւ Վիրք-Իբերիան¹²⁸: Սակայն այս դէպքում, ըստ իս, նմանութիւնը բոլորովին էլ պատահական չէ: Վրացական վարջանը պէտք է սերտ աղբիւր ունենայ վրկան կամ վարկան երկրանուանը: Հետաքրքիր է նաեւ, որ Վիրքի վարջան անուանը ուղեկցում են Կասպի քաղաքի եւ Կովկասեան լեռների տրուած Կասպիական լեռներ անուանումները: Վարկանը կամ վարջանը պէտք է ծագէր «գայլ» բառից, այսինքն՝ պէտք է նշանակէր «Գայլի երկիր»¹²⁹: Հետեւաբար հնարաւոր եզրակացութիւնն այն է, որ էթնոնիմը առաջացել է ցեղային տոտեմ հանդիսացած «գայլ» անունից: Մենք վերը արդէն փորձեցինք պարզաբանել կասպի-վրկան նոյնութեան հնարաւորութիւնը: Այն միանգամայն տրամաբանական էր Վրկանից աշխարհի

բնակչութեան համար: Այդ միանգամայն իրական է նաեւ Վիրքի առնչութեամբ: Կասպի-վրկանների մի մասը, դատելով կցկտուր անուղղակի նիւթից, հաստատուած է Արեւելեան Վրաստանի տարածքում՝ նրան փոխանցելով վրկան-վարկան-վարջան անունը, իսկ նրա քաղաքներից մէկին՝ Կասպի անունը: Ցաւօք, այդ տեղաշարժը չի արձանագրուել աղբիւրներում¹³⁰, սակայն կարելի է ենթադրել, որ այն կատարուել է, թերեւ, Դարեհ Ա Վշտասպի վարչական վերակառուցումներից եւ Ալեքսանդր Մակեդոնացու արշաւանքներից յետոյ՝ հիմք ունենալով Կասպիի գտնուելը Հիւսիսային Կովկասում¹³¹: Հասկանալի է, եթէ կասկածը հաստատուել են Այսրկովկասում մ. թ. ա. V դարի կէսերից յետոյ, ապա նրանք չէին կարող յիշատակուել Այսրկովկասի տարածքում գտնուող որեւէ սատրապութեան կազմում:

Կրկին վերադառնալով Կասպիի եւ վրկանների նոյնացման խնդրին՝ հարկ է նշել, որ պատմիկները եւ պատմաբանները պէտք է տեղադրուեն Վրկանից արեւմուտք եւ դարեւաններից արեւելք¹³²: Նիւթն այնքան սակաւ է, որ առարկութիւնների պակաս չի լինի: Սակայն ուշադիր քննութիւնը ցոյց է տալիս, որ միայն այս մեկնաբանութեան դէպքում է հնարաւոր, մասնաւորապէս՝ սասպերների եւ Մեդիայի հարեւանութիւնը: Այլ խօսքով՝ Դամաւանդ-Յասոնիոն լեռից արեւմուտք ընկած առափնեայ հողերը, որոնք օղակում են Կասպից ծովը հարաւարեւմուտքից, պէտք է մաս կազմէին Մեդիա-Մարաստանի: Ըստ որում նրանց սահմանակցութեան շրջանը պէտք է լինէր Կուր գետի ստորին աւազանը, ամէն ինչից դատելով, Երասխի եւ Կուրի միախառնումից մինչեւ Կասպից ծովն ընկած շրջանում:

Տասնմէկերորդ սատրապութիւնը Վրկանի եւ շրջակայ տարածքներում տեղադրելու դէպքում, չնայած վերը կատարուած քննութեանը, շարունակում է արտաքննապէս օրակարգում մնալ տասնհինգերորդ Այսրկովկասում տեղորոշուել խնդիրը, որովհետեւ սակ-սկիւթներն իրօք հաստատուել էին Գանձակ (ներկայիս՝ Գեանջա) քաղաքի շրջակայքում, երկրամասին տալով իրենց անունը (Սակասեւե-Օակաշէն), իսկ նրանցից ոչ շատ հեռու գտնուած է յունա-հռոմէական եւ հայկական աղբիւրների Կասպիան-Կասպի երկրամասը: Մեր քննութիւնը բացառում է նման հնարաւորութիւնը եւս: Ըստ որում դրա բանալին պէտք է փնտրել պարսկական սեպագիր արձանագրութիւններում:

Դարեհ Ա-ի Բիհիսթունեան ժայռի վրայ թողած եռալեզուեան արձանագրութեան մէջ, ինչպէս վերը նշել ենք, պարսից արքան յիշատակում է իրեն հպատակ 23 երկրների անուններ: Դրանց թւում հանդիպող Saka-Սակա երկիրը հանդիպում է Գադարա (= Գանդարա), Սատագուշ կամ Սատագիւրիա եւ Արաքոսիա երկրների մերձակցութեամբ կամ հարեւանութեամբ¹³³: Այս իրողութիւնը շատ ուսումնասիրողների, այդ թւում՝ նաեւ մեզ, իրաւունք է տալիս տասնհինգերորդ սատրապութիւնը տեսնելու Միջին Ասիայի տարածքում: Մեր խնդիրը չէ, անշուշտ, մանրակրկիտ քննարկել, թէ սակ-սկիւթները Միջին Ասիայի յատկապէս որ շրջաններն էին բնակեցնում, սակայն բերուած ցանկացած տեղադրութեան դէպքում բացառում է սրանց Այսրկովկասում տեսնելու հնարաւորութիւնը: Կայ մի հանգամանք եւս, որն արժանի է լուրջ ուշադրութեան: Բիհիսթունի արձանագրութեան մէջ վերջին հպատակ երկիրը Մական է, որն զբաղեցրել է Իրանի եւ Բելուշիստանի հարաւային շրջանները՝

դուրս գալով Հնդկական օվկիանոս, եւ այժմ յայտնի է Մոկրան անունով: Երկրները ցանկում բացակայում է Հնդկաց աշխարհը, որը կազմում էր քսաներորդ սատրապուլթիւնը¹³⁴: Վերը մենք ցոյց տուցինք, որ տասնութերորդ, տասնիններորդ եւ քսաներորդ սատրապուլթիւնները կազմուել են վարչական վերակառուցումների վերջին փուլում: Այսինքն՝ Բիհիսթունի արձանագրութիւնը գրելիս Դարեհ Ա-ը դեռեւս չէր կարողացել նուաճել ո՛չ Ռոդիկներին, ո՛չ էլ սասպէրներին, ալարողներին եւ մոսքերին ու կոլքերին, ինչպէս նաեւ Սեւ ծովի հարաւարեւելեան առափնեայ շրջանը բնակեցնող ցեղերին: Հետեւաբար, Վ. Վ. Ստրուվէի կողմից արձանագրութեան սակերին Սակասենէ-Օակաշէնի սակերի հետ նոյնացնելու փորձը¹³⁵ լուրջ կռուաններ չուներ: Աւելին՝ այն հակասում է թէ՛ Հերոդոտոսի միւս տուեալներին եւ թէ՛ պարսկական արձանագրութիւնների հաղորդումների տրամաբանութեանը¹³⁶: Անկախ այն հանգամանքից, հայաստանեան սակերը կորցրել էին իրենց էթնիկ դիմագիծը V դ., թէ ոչ, նրանք պէտք է համարուէին Արմենիայի բնակիչներ կամ էլ վերագրուէին սասպէրների ցեղախմբին: Բիհիսթունի արձանագրութիւնը դեռեւս չի արձանագրում սասպէրների ենթակայութիւնը Դարեհ Ա-ի տէրութեանը, հետեւաբար սակերի յիշատակութիւնը սասպէրների անուան ներքոյ հնարաւոր չէ: Ինչ վերաբերում է առաջին տարբերակին, ապա անտարակոյս է Սակասենէ-Օակաշէնի Արմենիայի մէջ վարչականօրէն գտնուելու իրողութիւնը: Հայաստանը մինչեւ Աքեմէնեան Պարսկաստանի գերիշխանութիւնն ընդունելը ուժեղ թագաւորութիւն էր՝ ռազմական մեծ հնարաւորութիւններով: Յայտնի իրողութիւն է, որ ամէն մի պետութիւն ձգտում է իր

սահմանները հասցնել որոշակի բնագծերի՝ լեռնաշղթաների, գետերի, ծովափի եւ այլն: Հայաստանի հիւսիս-արեւելքում այդպիսի բնագիծ էր Կուր գետը, որը եւ սահման է հանդիսացել Աքեմէնեան Պարսկաստանի համար Բիհիսթունեան արձանագրութիւնը փորագրելու ժամանակ: Ուստի խիստ տրամաբանական է սակերի կամ նրանց այսրկովկասեան հատուածի Հայաստանին վերաբերելը: Գանձակի սակերից եւ մերձկուրեան կասպերից եթէ սատրապուլթիւն կազմուած լիներ, ապա այն ոչ միայն կը հակասէր Հերոդոտոսի միւս տուեալներին, այլեւ խիստ զարմանալի պիտի լինէր այս անշան տարածաշրջանի կողմից 250 տաղանդի չափով հարկատուութիւնը:

Այժմ, հետադարձ հայեացք նետելով կատարուած քննութեանը՝ կարող ենք արձանագրել, որ Կուրից հիւսիս մինչեւ Կովկասեան լեռներն ընկած տարածքը զբաղեցնում էին մատիեմները, սասպէրները եւ ալարողները, որոնք, սակայն, Պամահօր մէկ այլ վկայութեամբ՝ յայտնի էին նաեւ մէկ ընդհանրական սասպէր անունով, եւ այդ պատճառով էլ Կողքիսից մինչեւ Մեդիա Հերոդոտոսը արձանագրում է միայն մէկ ժողովուրդ՝ սասպէրներին: Ելնելով վերը շարադրուածից՝ կարելի է յստակեցնել տասնութերորդ սատրապուլթեան սահմանները: Հիւսիսում սատրապուլթեան սահմանը համընկնում էր Աքեմէնեան Պարսկաստանի պետական սահմանին եւ անցնում էր Կովկասեան մեծ լեռնաշղթայով՝ հասնելով մինչեւ ներկայիս Դերբենդ քաղաքի հիւսիսային մատոյցները (հնում՝ Ճորա պահակի շրջան), արեւելքում՝ Կասպից ծովով մինչեւ Կուրի գետաբերանը, հարաւում՝ Կուր գետով եւ Թուրքի լեռնաշղթայի ջրբաժանով կամ էլ Խրամ գետով, սահմանակցելով տասներեքերորդ սատրա-

պուլթեան մէջ մտնող Հայաստանին, եւ արեւմուտքում, ամենայն հաւանակաւութեամբ, Սուրամի լեռներով մինչեւ Կովկասեան մեծ լեռնաշղթան, սահմանակցելով տասնիններորդ սատրապուլթեանը: Այսուհանդերձ ծագում է մի հարց եւս: Հայաստանը տարածքով մեծ երկիր է, ուստի արդեօ՞ք տրամաբանական է նրա կողմից ընդամէնը 400 տաղանդ հարկ մուծելը: Եւ, իրօք, առաջին հայեացքից էլ կարծես պարզ է, որ Հայաստանի հարկաչափը, եթէ զիջէր էլ Միջագետքի եւ Եգիպտոսի հարկաքանակին, այնուամենայնիւ շատ մեծ տարբերութիւն չպէտք է ունենար այն դէպքում, երբ իրականում Բաբելոնից եւ մնացեալ Ասորեստանից ստացուած հարկը գերազանցում էր տասներեքերորդ սատրապուլթեան հարկաչափը 600 տաղանդով, իսկ Եգիպտոսից ստացուածը՝ 300 տաղանդով¹³⁷: Կարծում ենք, որ հարցի պատասխանը տալիս է Ստրաբոնի «Աշխարհագրութիւնը», որի համաձայն Արմենիան տարեկան 20000 քուռակ էր ուղարկում պարսից թագաւորին Միթրայի տօնի համար¹³⁸: Անշուշտ, կարելի է կարծել, թէ 20000 քուռակները ուղարկուել են 400 տաղանդ հարկի դիմաց, սակայն Կիլիկիայի կապակցութեամբ Հերոդոտոսի յայտնած այն տեղեկութիւնը, թէ կիլիկեցիները պարսից թագաւորին տալիս էին տարեկան 360 ճերմակ ձի եւ 500 տաղանդ արծաթ¹³⁹, այդ կարծիքը ջրում է: Պարզապէս մեզ անյայտ պատճառով Հերոդոտոսի երկը տասներեքերորդ սատրապուլթեան հարկերի մէջ մոռացել է արձանագրել 20000 քուռակներ հարկ տալը:

Ամփոփենք: Կարելի է վստահօրէն եզրակացնել, որ XVIII սատրապուլթիւնը, որ հայագէտների մի մեծ ծաղկաբոյլ մշտապէս փորձել է տեղադրել Արեւելեան Հայաստանի տարածքում, Հայաստանում

չի գտնուել, որն ամբողջութեամբ՝ մտել է XIII սատրապուլթեան մէջ:

ԾԱՆՕԹԱԳՐՈՒԹԻՒՆՆԵՐ

- 1 Հերոդոտոս, Պատմութիւն ինը գրքից, թարգմանութիւնը Ս. Կրկեաշարեանի, Երեւան, 1986, III, 90:
- 2 Բնագրի 'Αρμενίων-ը թարգմանում են եւ «արմեններ» եւ «Արմենիա»: Ըստ Ս. Կրկեաշարեանի երկու թարգմանութիւնն էլ հնարաւոր են, սակայն առաւելութիւնը տուել է «արմեններին»: Մեր կարծիքով, հազի թէ Հայաստանը որպէս երկիր չմշուէր, առաւել եւս, որ գբաղեցնում էր սատրապութեան տարածքի հիմնական, գերակշիռ մասը:
- 3 Հերոդոտոս, III, 93:
- 4 Աճո, III, 94:
- 5 Գ. Սարգսեան, Պատմաֆայր Հերոդոտոս, տե՛ս Հերոդոտոս, էջ 576:
- 6 Այսպիսի կարծիք են յայտնել այնպիսի մշակաւոր հայագէտներ, ինչպիսիք են Հ. Հիւրշմանը եւ Յ. Մանանդեանը: Ըստ առաջինի՝ այսրեփրատեան Հայաստանը պարունակել է իր հետագայ 15 մահաճգերից հազի չորսը՝ «Չորրորդ Հայքը (իմա՝ Մոկիքը - Յ. Բ.), Աղձնիքը, Տուրուքերանը եւ Այրարատը» (Հ. Հիւրշման, Հին Հայոց տեղւոյ անունները, Վիեննա, 1907, էջ 16), իսկ երկրորդը, ընդհանուր առմամբ ընդունելով Հիւրշմանի եզրակացութիւնը, գտնում էր, որ այն «Ըստ իս մօտաւորապէս ճիշտ է, բայց կարօտ է որոշ ուղղման: Արմենները, ինչպէս վերը ասացինք, դեռեւս հնագոյն ժամանակներում գրաւուած են եղել, հաւանօրէն, նաեւ մի քանի շրջաններ Վանայ լճի հարաւում եւ հարաւ-արեւելքում: Իսկ Այրարատ մահաճգը նրանք գրաւել էին այդ ժամանակ ոչ ամբողջութեամբ» (Յ. Մանանդեան, Քննական տեսութիւն հայ ժողովրդի պատմութեան, հտ. Ա, Երեւան, 1944, էջ 103): Ծարունակելով իր միտքը զարգացնել՝ Յ. Մանանդեանը գտնում է, որ հայերը կամ արմենները Երուսաղեանների առաջնորդութեամբ «դեռեւս երրորդ դարում մեր թուականութիւնից առաջ գրաւել էին Այրարատեան դաշտը, եւ Արմաիքը դառնել էր այստեղ Երուսաղեան թագաւորութեան աթոռահատ կենտրոնը: Ըստ երեսօրի, հե՛տք այս թագաւորութիւնն է այն հին Արարատեան թագաւորութիւնը, որի մասին աղօտ եւ խառնաշփոթուած յիշողութիւններ պահպանուած են Խորենացու պատմութեան մէջ: Սելեւկեան շրջանի արմենական այս երկիրը պարզապէս այն կորիզն է, որից հետագիւտեալ աճեց ու զարգացաւ հետագայում անկախ ու հօր Մեծ Հայաստանը» (էջ 104): Այս տեսակետը այլեւայլ կապակցութեամբ պաշտպանել են Յ. Մարքուարթը, Գ. Խալաթեանը, Յ. Սանտալեանը եւ ուրիշներ, որոնք հակուած էին մ. թ. ա. երրորդ դարի երկ-

րորդ կեսին Արմաիրը տեսնելու Ասորպատականի Արտարազանէ թագաւորի իշխանութեան ներքոյ (*J. Marquart, Erānsahr nach der Geographie des Ps. Moses Xorenac'i, Berlin, 1901, էջ 108: Գ. Խալատյան, Очерк истории Армении, Москва, 1910, էջ 128: Sandaljian Jos., Histoire documentaire de Arménie, t. II, Rome, 1917, էջ 414 եւ այլք): Եթէ մեզ տեսակէտը ինչ-որ չափով հասկանալի էր հայագիտութեան XX դարի սկզբի մակարդակի պայմաններում, ապա այն միանգամայն անյարիր է մեր օրերին, երբ պատմագիտական միտքը մեծ նուաճումներ է ձեռք բերել: Ուստի պարզապէս զարմանալ կարելի է, որ վերջերս ԱՄՆ-ում լոյս տեսած "The Armenian People from Ancient to Modern Times" (Volume I, Edited by Richard G. Hovannisian, University of California, Los Angeles, St. Martin's Press, New York, 1997, էջ 39) աշխատութեան հեղինակներից Նիմա Գարսոյեանը "The Achaemenid Satrapy of "Armina", c. 550-330" (կարծում ենք, որ քարտեզի հեղինակը նա է, որովհետեւ համապատասխան բաժինը պատկանում է նրա գրչին) քարտեզում Այրարատից Արմինայի մէջ մտնում է միայն Բասենի դաշտը եւ Երասխաձորը, իսկ մնացած հատուածը յատկացնում է այլեւայլ ցեղերի: Ասել է թէ՛ հեղինակը հաշտի չի առել հայագիտութեան վերջին ձեռքբերումները:*

7 Տե՛ս մանրամասն *Յովհաննէս Կարազեղզեան, Սեպագիր տեղանուններ, Երեւան, «Մագաղաթ», 1998, էջ 133-134, 234-235 եւ այլն: Տե՛ս նաեւ Բ. Յարութիւնեան, Արցախի, Հայոց Արեւելից կողմերի եւ Ղարաբաղի տարածքի հարցի շուրջը. տե՛ս ՊԲՀ, 1994, թիւ 1-2, էջ 257-259:*

8 *Ա. Ի. Դովատըր, Դ. Ս. Կալլիստով, Ի. Ա. Շիշովա, Народы нашей страны в "Истории" Геродота. Тексты, перевод, комментарий, изд. "Наука", Москва, 1982, с. 191-192.*

9 *Junge J., Saka-Studien, տե՛ս Klio, 1939, Beiheft XLI, էջ 44f:*

10 *Բ. Ա. Տոբրանըր, Վ. Մ. Մասունըր, Ի. Մ. Դեակոնովը եւ ուրիշներ:*

11 *Դյակոնով Ի. Մ., История Мидии, М.-Л., 1956, էջ 342 եւ այլն:*

12 *Herodoti Historiae. Recognovit breuique adnotatione critica instruxit Carolus Hude. Vol. I-II. Editio altera. Oxonii, 1912, III, 90-91: Տե՛ս նաեւ Հերոդոտոս, Պատմութիւն ինը գրքից, թարգմանութիւնը Սիմոն Կրկեաշարեանի, III, 90-91:*

13 *Геродот, История, в девяти книгах, Перевод и примечания Г. А. Стратановского, М., 1972, с. 517.*

14 *Herodotus, III, 91-92:*

15 Ա.Ն, III, 93:

16 Ա.Ն, III, 97:

17 Ա.Ն:

18 *Գ. խ. Սարգսեան, Պատմաբանը Հերոդոտոսը, տե՛ս Հերոդոտոս, Պատմութիւն ինը գրքից, էջ*

573-574: Ա. Ի. Դովատըր, Դ. Ս. Կալլիստով, Ի. Ա. Շիշովա, Народы нашей страны в "Истории" Геродота. էջ 185, 178, 198: Մանրամասն տե՛ս How W.W. Wells J. A. Commentary on Herodotus, Oxford, 1928, I-II. Weißbach W., Материал, RE, 1930, XIV.

19 *Herodotus, I, 72:*

20 Ա.Ն, VII, 72:

21 Ա.Ն, V, 49:

22 Ա.Ն, I, 189:

23 Ա.Ն, V, 52:

24 *Գ. Սարգսեան, Պատմաբանը Հերոդոտոսը. տե՛ս Հերոդոտոս, էջ 573: Հեղինակի կարծիքով, Հայաստանից սկիզբ առնող գետը, թերեւս Բոհիտանու-Կենտրիտեան է եւ ոչ թէ Մեծ Զարը: Սակայն այդ հնարարը չէ, որովհետեւ խօսքը վերաբերում է նոյնանուն գետերին եւ, որ կարելի է պարսից «Արքայական ճանապարհը» Տիգրիսը հատել է ոչ թէ Կենտրիտեայից հիւսիս, այլ հարաւ:*

25 *Herodotus, I, 202:*

26 *The Geography of Strabo, with an English translation by Horace Leonard Jones. In eight volumes, London, 1969, XI, XIV, 13:*

27 *Strabo, I, III, 4:*

28 Ա.Ն, II, I, 14. «Նոյնպէս է լինում Մատիսենում՝ Մարաստան, եւ, Սակասենում ու Արաքսենում՝ Հայաստան»:

29 Ա.Ն, XI, VII, 2. «Նոյնը լինում է Մարաստանում՝ Մատիսանէի մէջ եւ Հայաստանում՝ Սակասենէի ու Արաքսենէի մէջ»:

30 Ա.Ն, XI, VIII, 8:

31 Ա.Ն, XI, XIII, 2:

32 Ա.Ն, XI, XIII, 7:

33 Ա.Ն, XI, XIV, 8. «Հայաստանում կան նաեւ մեծ լճեր. արանցից մէկն է Մանտիսանէն (թարգմանում է Կապոյտ), որ, ինչպէս ասում են, Մայրտիսից յետոյ մեծագոյնն է աղի լճերի մէջ եւ տարածում է մինչեւ Ասորպատենէ եւ ունի աղահանքեր»:

34 Ա.Ն, XI, XIII, 2:

35 Ա.Ն, XI, XIII, 2. ծնթ. թիւ 3:

36 *Claudii Ptolemaei Geographia, edidit Carolus Fredericus Augustus Noebbe, Tom I, Lipsiae, 1843, lib. VI, cap.2, § 2. Καδοσιών ... το μέσον τῆς συναπτούσης αὐτῶ λίμνης, καλουμένης Μαρτιανῆς...*

37 Ա.Ն, lib. VI, cap. 2, § 5 (թարգմանութիւնը Գ. Մորարեանի):

38 Ա.Ն, lib. VI, cap. 2, § 3 (Մեծ Հայքում լիճը յիշում է Արսեսա անունով). VI, cap. 2, § 2:

39 Մանրամասն տե՛ս Բ. Յարութիւնեան, Հայ Արշակունիների ձեռական իշխանութեան հարցի շուրջը, տե՛ս ՊԲՀ, 1988, թիւ 3-4:

40 *Pliny, Natural History, with an English transl. in ten volumes, by H. Rackham, London, 1952-1962 (Loeb Classical library), Libri VI, 17, 18: Մօտաւորապէս նոյն տունակներն է պարունակում Պոլի-*

բիոսի «Պատմութիւն»-ը, որը կաղուսիներին յիշում է մատիսենների հարեւանութեամբ (Polybii Historiae, rec. Fr. Hulstsch, Berlin, Weidm., 1888-1892, V, 44, 9):

41 *Stephani Byzantii Ethniconum quae supersunt. Ex recensione Aug. Meinekii, t. I, Berlin, 1849, տե՛ս Моσχол. Տե՛ս նաեւ ВДИ, 1948, թիւ 3, էջ 323:*

42 *Ի. Ա. Դձաւախիւիլի, Историко-этнологические проблемы Грузии, Кавказа и Ближнего Кавказа, Тбилиси, 1950 (վրաց.), էջ 18 եւ այլք (վերցում է Ն. Խազարաձէի յօդուածից): Տ. Ն. Դձաւախի, Труды, II, Тбилиси, 1952 (վրաց.), էջ 53-55 (վերցում է Ն. Խազարաձէի յօդուածից), Գ. Ա. Մելիքիւիլի, К истории древней Грузии, Тбилиси, 1959, էջ 266: Ի. Ի. Դյակոնով. Предыстория армянского народа, Ереван, 1968, էջ 17, ծնթ. 19. Ի. Բ. Խազարաձէ, К вопросу о локализации матиенов в свете древнегреческих источников VI-V вв. до н. э., - տե՛ս ՊԲՀ, 1973, թիւ 2, էջ 201-210:*

43 *Herodotus, II, 94:*

44 *Xenophontis Expositio Cyri, recensuit Guilelmus Gemoll, Editio minor, Bibliotheca Teubneriana, Lipsiae, 1910, IV, VII, 1-24, V, IV, 1-30, V, 1-3. Տե՛ս նաեւ Քսենոփոն, Անարախիս. թարգմանութիւնը Սիմոն Կրկեաշարեանի, Երեւան, 1970, IV, VII, 1-24, V, IV, 1-30, V, 1-3:*

45 *Բ. Ա. Արտյոյան. К вопросу об этнической принадлежности населения бассейна реки Чорох в VII-IV вв. до н. э., - տե՛ս ՊԲՀ, 1998, թիւ 1-2, էջ 235:*

46 *Ի. Ի. Դյակոնով, Предыстория армянского народа, Ереван, 1968, էջ 218:*

47 *Բ. Ա. Արտյոյան, Աշ. աշխ., էջ 233-246:*

48 *Plinii Secundi C., Naturalis historiae, vol. 1-10. Cambridge, Mass.-London, 1950-1962 (Loeb Classical Library), VI, 4, 12-13:*

49 Ա.Ն, VI, 11. 29. Պոլիսոսը եւս մէկ անգամ յիշում է մի ցեղ սոսրէն (Moschen) անունով (VI, 10, 26), սակայն դժուար է ասել, թէ տունակ դէպքում խօսքը վերաբերում է Մոսրէրին, թէ Հայաստանի հարաւում հաստատուած մուշկերի մնացորդներին:

50 *Գ. Ա. Մելիքիւիլի, Напри-Урарту, Тбилиси, 1959, էջ 315. Ի. Ի. Դյակոնով, Предыстория..., էջ 222:*

51 *Յովհաննէս Կարազեղզեան, Սեպագիր տեղանուններ, Երեւան, 1998, էջ 182:*

52 *Xenophontis Expositio Cyri, V, VI, 36:*

53 Այս մտնեցումը հասկանալի է դարձնում նաեւ Փոթիին տրուած Փաշը անունը, որտեղ «դ»-ն անկան է: Իհարկէ, սկզբում անկանը եղել է «տ» հնչիւնը, սակայն վերջինս ժամանակի ընթացքում հնչեղանակով վերածուել է «դ»-ի: «Տ»-ի անկանը հնդեւրոպական երեւոյթ է եւ ընդհանրապէս Փասիս քաղաքանունն հետագայ փոփոխութիւնները կատարում են հնդեւրոպական հնչիւնական օրինաչափութիւններով: Փա-

սիս (իրականում՝ Փասիս)-Փասիս-Փաշիս-Փաւս-Փոս-Փոթ-Փոթի: «Փոթի» նոր արտասանութեան մէջ «ի»-ն վրացական վերջաւորութիւն է:

54 *Xenophontis Expositio Cyri, IV, VI, 4:*

55 *Ի. Գ. Վոլկովա, Этнонимы и племенные названия Северного Кавказа, М., 1973, էջ 94:*

56 Ա.Ն, էջ 96-97:

57 «Անարախիս»-ի տունակների համաձայն, մ. թ. ա. V դ. *Փասիսաններն* արդէն հայացած էին, որովհետեւ հայոց գիտապետը լոյս զօրավարների այն հարցին, թէ ովքեր են նրանց հարեւանները, յիշատակում է միայն խալիքներից, չնայած լոյսերը մինչեւ խալիքների երկիրը հասնելը ստիպուած եղան կտրել *Փասիսանների եւ տախիւների* երկրամասերը (IV, VI, 1-22, VII, 1-18):

58 *Strabo, XI, II, 14:*

59 *Stephani Byzantii Ethniconum, տե՛ս Քարիստաններ:*

60 Ա.Ն:

61 *Strabo, XI, II, 18. «Մոսրիկէն, ուր գտնում է սրբատեղին, բաժանում է երեք մասի. առաջինը կոյրերի իշխանութեան տակ է, երկրորդը՝ վրացիների, իսկ երրորդին տիրում են հայերը»:*

62 *Մ. Դեակոնովը եւ ուրիշներ սովորելով էթնանունը բխեցնում են ինքական աղբիւրների ծովում եւ ասորեստանեան բեռնագրերի Սուխում երկրանունից (Ի. Ի. Դյակոնով, Предыстория..., էջ 234, ծնթ. 113): Այս տեսակէտը, որ ծագում է Գ. Խալատյանից, պաշտպանել են նաեւ Բ. Պոտոլուսկին եւ Գ. Մելիքիւիլի, սակայն իրաւացիօրէն մերժում է Ս. Երեւեանը («Հայ ժողովրդի պատմութիւն», ՀՍՍՀ ԳԱ հրատ., հտ. Ա, էջ 240): Եւ իրօք, այն բնութիւն չի բռնում, որովհետեւ վրացական ցեղերի բնակութեան հարաւային սահմանագիծը շատ հեռու էր գտնում Սուխումի տարածքից:*

63 *Josephi Flavii Opera Omnia, recogn. Imman. Bekker, "Bibl. Teubneriana", I. 125:*

64 *В. В. Латышев, Известия древних писателей о Скифии и Кавказе, - տե՛ս ВДИ, 1948, թիւ 3, էջ 137, 293:*

65 *Բ. Յարութիւնեան, Հայաստանի, հայ-իրանական յարաբերութիւնների եւ Առաջաւոր Ասիայի հնագոյն պատմութեան մի քանի խնդիրների շուրջ (մ. թ. ա. VII-VI դդ.), Երեւան, 1998, էջ 63-68:*

66 *Մովսիսի Խորենացոյ Պատմութիւն Հայոց, աշխատութեամբ Մ. Արեղեան եւ Ս. Յարութիւնեան, Տփղիս, 1913, Ա, գլ. ԺԴ:*

67 «Հայ ժողովրդի պատմութիւն», ՀՍՍՀ ԳԱ հրատ., Ա, հտ., Երեւան, 1971, էջ 234:

68 *Ի. Ի. Դյակոնով, Предыстория..., էջ 223:*

69 *Հր. Աճառեան, Հայերէն արմատական բառարան, հտ. Գ, Երեւան, 1977, էջ 335:*

70 «Հայ ժողովրդի պատմութիւն», ՀՍՍՀ ԳԱ հրատ., Ա, հտ., էջ 650-652:

71 *Herodotus, VII, 78: Տե՛ս նաեւ Հերոդոտոս, Պատմութիւն ինը գրքից, VII, 78:*

72 Աճղ, I, 72:
 73 *Xenophontis Expeditio Cyrii*, V, V, 1-3:
 74 *Stephani Byzantii Ethnicorum*, տե՛ս *Տիրարեմիա*:
 75 *Xenophontis Expeditio Cyrii*, V, V, 3:
 76 Սպիտակ ասորիների կամ լեկոսիրիացիների
 անուն տեղադրությունը մնում է հաստատուն
 անախտորոշի տեղեկությունների համաձայն:
 Ըստ նրա՝ Միհրդատ Զ Եւպատրոսը տիրում էր
 մի երկրի, որը տարածում էր Հալիսից մինչև
 տիրարանների երկիրը եւ Հայաստան (XII, III,
 1), ըստ որում նա Հալիսից արեւմուտք տեղորոշ
 րում է *պսիլլագոնների*, իսկ արեւելք՝ *կապա
 դովկիացիների* (XII, III, 2), որոնց նույնացնում է
 լեկոսիրիացիների (XII, III, 9, 12, 25):
 77 *Xenophontis Expeditio Cyrii*, IV, IV, 4, 14, VII,
 VIII, 25:
 78 Աճղ, IV, IV, 14:
 79 *Plinii Secundi C. Naturalis historiae*, VI, 10, 26.
 «Իսկ Արաքսը [սկիզբ է առնում - Յ. Բ.] նոյն լեռ
 անքում, որտեղ [սկիզբ է առնում] Եփրատը,
 [նրա ակունքից] 6 մղոն հեռավորության վրայ,
 եւ, իր մէջ առնելով Ռուսիս [իմա՝ Մուր
 սիս=Մուրց] գետը, ինքն իր հերթին, ինչպէս
 ճշում էին շատերը, թափում է Կիրոսի մէջ եւ
 նրա հետ տարում դէպի Կասպից ծովը»: Տե՛ս
 նաեւ «Աշխարհացոյց Մովսէսի խորհրդացոյ յա
 լելուածովք նախնեաց», Վենետիկ, 1881, էջ 30,
 31, 33:
 80 *Xenophontis Expeditio Cyrii*, VII, VIII, 25:
 81 *Herodotus*, IV, 40:
 82 Աճղ, IV, 37:
 83 Աճղ, I, 104:
 84 Աճղ, VII, 79:
 85 *В. В. Латышев*, Известия древних писателей о
 Скифии и Кавказе, տե՛ս ВДИ, 1947, թիւ 3, էջ
 280:
 86 Աճղ, էջ 282. տե՛ս նաեւ *Ապոլլոնիոսի* «Արգոնա
 տորների արշաւ»-ի սքրիպան:
 87 Աճղ, էջ 288:
 88 ВДИ, 1948, թիւ 3, էջ 268:
 89 *Stephani Byzantii Ethnicorum*, տե՛ս *սիւլլոյրներ*:
 90 *Б. А. Арутюнян*, К вопросу об этнической при
 надлежности населения бассейна реки Чорох в
 VII-IV вв. до н. э., - տե՛ս ՊԲՀ, 1998, N 1-2, էջ
 240-241:
 91 «Աշխարհացոյց Մովսէսի խորհրդացոյ», էջ 35:
 Համաձայն խմբագրութեան մէջ «Ասեաց փոք» է:
 92 *Б. А. Арутюнян*, К вопросу об этнической при
 надлежности..., էջ 240:
 93 *И. М. Дьяконов*, Предыстория..., էջ 17, 240:
 94 *Г. А. Меликишвили*, К истории древней Грузии,
 Тбилиси, 1959, էջ 102:
 95 *Herodotus*, III, 97:
 96 Աճղ, III, 92:
 97 Աճղ, III, 93:
 98 *Струве В. В.*, Этюды по истории Северного
 Причерноморья, Кавказа и Средней Азии, Л.,
 1968, էջ 18:

99 *И. М. Дьяконов*, История Мидии, М.-Л.,
 1956, էջ 359:
 100 *А. И. Доватур, Д. П. Каллистов, И. А. Шишова*,
 Народы нашей страны в "Истории" Геродота., էջ
 196, ծմթ. 101:
 101 Աճղ:
 102 *How W., Wells J.*, A Commentary of Herodotus,
 Oxford, 1928, I-II, տե՛ս *А. И. Доватур, ...*,
 Народы нашей страны..., էջ 196, ծմթ. 101: Հմմտ.
Junge J., Sake-Studien, տե՛ս "Klio", 1939, Beiheft
 XLI, էջ 84:
 103 *И. М. Дьяконов*, История Мидии, էջ 103, 364:
 Հմմտ. *Хлопин И. Н.*, Этнография державы
 Ахеменидов по Геродоту, "Страны и народы
 Востока" գրքում, М., 1969, вып. 87, էջ 286:
 104 *И. М. Дьяконов*, История Мидии, էջ 359:
 105 *Струве В. В.*, Этюды по истории Северного
 Причерноморья, Кавказа и Средней Азии, 55,
 110.
 106 Աճղ:
 107 *А. И. Доватур, ...*, Народы нашей страны..., էջ
 196, ծմթ. 101:
 108 *Stein H.*, Herodotus erklärt von H. Stein, Berlin,
 1869, ad III, 92, 2: *Пьянков И. В.*, "История Пер
 сии" Ктесия и среднеазиатские сатрапии Ахеме
 нидов в конце V в. до н. э., ВДИ, 1965, թիւ 2,
 էջ 45:
 109 *Herodotus*, III, 117:
 110 Աճղ, VII, 62:
 111 Աճղ, VII, 67:
 112 *Roland G. Kent*, Old Persian, grammer, texts, lexi
 con, Second Edition revised, New Haven, Con
 necticut, 1953, էջ 117: Տե՛ս նաեւ «Դարեմ
 Վշտասպի Բիսեթունեան արձանագրութիւնը»,
 թարգմանութիւնը բնագրից, առաջաբանը եւ ծա
 նոթագրութիւնները՝ Գ. Մ. Նալբանդեանի, Երե
 ւան, 1964, էջ 8:
 113 Աճղ, էջ 122, II սիւնակ, § 35. տե՛ս նաեւ «Դարեմ
 Վշտասպի Բիսեթունեան արձանագրութիւնը»,
 էջ 17:
 114 *Claudii Ptolemaei Geographia*, Lib. VI, cap. 2, « 6:
 115 *Strabo*, XI, VIII, 8:
 116 Աճղ, XI, VII, 1:
 117 Աճղ, XI, VIII, 8:
 118 Աճղ, XI, 2, 5:
 119 *А. А. Акопян*, Албания-Алуанк в греко-латинских
 и древнеармянских источниках, Ереван, 1987,
 էջ 38:
 120 Շատ անտիկ հեղինակներ Կասպից ծովը համա
 րում էին Հիւսիսային ովկիանոսի ծոցը եւ են
 թադրում էին նրանց միացնող նեղուցի գոյութիւ
 նը: Այդ կարծիքը չէին կիսում Հերոդոտոսը,
 Պտղոմէոսը եւ մի շարք հեղինակներ:
 121 *В. В. Латышев*, Известия древних писателей о
 Скифии и Кавказе, - տե՛ս ВДИ, 1949, թիւ 1, էջ
 284, 274:
 122 Աճղ:
 123 Աճղ. տե՛ս ВДИ, 1948, N 1, էջ 240-241:

124 *А. А. Акопян*, Албания-Алуанк..., էջ 39:
 125 Աճղ. *Джафаров Ю. Р.*, Гунны и Азербайджан,
 Автореф. дисс., Баку, 1981, էջ 4-5; *Ашурбегли
 С.*, Государство Ширваншахов (VI-XVII вв.), Ба
 ку, 1983, էջ 18:
 126 «Աշխարհացոյց Մովսէսի խորհրդացոյ», էջ 40.
 «Քուստի Կապկոն, որ կողմն Կասկասու լեռանց
 յորում են աշխարհ երեքտասան. Ատրպատա
 կան, Արմն (որ է) Հայք, Վարջան, որ է Վիրք,
 Ռամ՝ որ է Աղուանք, ...»:
 127 Աճղ. «Քուստի խորասան, որ է կողմ արեւելից.
 յորում է աշխարհ քսան եւ վեց, այսինքն գոր ա
 սեմ. Ահմադան, Կոշմ, Վարկան, Ապրշաբր,
 Մրվ, ...»:
 128 Այսուհանդերձ այդ խնդիրը յատուկ քննութեան
 կարիք ունի - Յ. Բ.:
 129 *Roland G. Kent*, Old Persian, չ՛Ա 206:
 130 *Xenophontis Expeditio Cyrii*, I, V, 2:
 131 *Այս հարցը կարող է նաեւ այլ լուսաբանում
 ստանալ «Կիրոպեդիա»-ի տուեալների լոյսով:*
 132 *Պատիկները եւ պանտիմաթները*, ցարթ, այլեւ
 չեն յիշատակում աղբիւրներում, որը եւ հնարա
 տրութիւն չի տալիս պարզելու ստուգապէս ոչ
 նրանց բնակութեան որոշակի տարածքը, ոչ էլ
 էթնիկական պատկանելիութիւնը: Ի. Մ. Դեակո
 նովը, թերեւս, այդ անորոշութեան պատճառով,
 հնարատր է համարում *պատիկների, պանտի
 մաթների եւ դարեյտների կարդուսիական կամ
 կատիշական* ցեղեր լինելը եւ *անարիականների*
 մերձկասպեան ցեղայնութիւն պատկանելը (Исто-

рия Мидии, էջ 447): Մեր կարծիքով, վերոյիշեալ
 երեք ցեղերը աւելի շուտ կարող էին պատկանել
անարիականների աշխարհին կամ *Վրկանից* ցե
 ղայնութիւն, քան *կատիշանների*:
 133 *R. G. Kent*, Old Persian, էջ 117. "Gadāra: Saka:
 Θαγαυῖς: Haraunvatis: (=Արաքսիսիա)":
 134 *Herodotus*, III, 94:
 135 *Струве В. В.*, Этюды..., էջ 18 եւ այլք:
 136 Կասպերի յիշատակութիւնը տասնմէկերորդ եւ
 տասնհինգերորդ սատրապութիւնների կազմում
 առիթ է տուել Ռայցին *Κάσπιοι-ին* սրբագրելու
Κάσπειροι, յենուելով Ստեփանոս Բիզանդացու
 «5. v. Κάσπειρος - πόλις Πάρθων προσεχῆς τῆ
 'Ινδικῆ» տեղեկութեան վրայ: Նոյնպիսի սրբագ
 րութիւն նա կատարել է Հերոդոտոսի «Պատմութե
 աւան» մէջ (VII, 86, 2): Հ. Շթայնը վստահօրէն
 հրաժարում է քննարկել *կասպերի* յարաբերակ
 ցութիւնը *Κάσπειροι-ին* կա՛մ *Κασπεραῖοι-ին*,
 կա՛մ էլ *Քաթուլ* գետի վրայ գտնուող *Κασπάπυ
 ρος* քաղաքի բնակիչներին (տե՛ս *А. И. Доватур,
 ...*, Народы нашей страны ..., էջ 96, ծմթ. 101):
 Այս խնդիրը, կարծում եմ, կարեւորութիւն է ներ
 կայացնում եւ կարիք ունի առանձին քննու
 թեան):
 137 *Herodotus*, III, 91-92:
 138 *Strabo*, XI, 14, 9:
 139 *Herodotus*, III, 90:
 137 *Herodotus*, III, 91-92:
 138 *Strabo*, XI, 14, 9:
 139 *Herodotus*, III, 90:

